



## GOVERNUN KONSTITUSIONÁL VII NIAN

---

# PROGRAMA GOVERNUN KONSTITUSIONÁL VII NIAN

1 Ohin leron Timor oan sira bele sente otimista kona-ba futuru. Ita nia unidade mai husi soberania husi fronteira sira, valór husi ita nia territóriu nasional, ita nia istória, ita nia ema, ita nia identidade. Iha mundu ne'ebé globalizadu tebes ita tenke fó prioridade ba inovasaun no dedika tempu, matenek no esperiénsia barak liu tan ba produsaun nasional. Hamutuk ita tenke konsolida ita nia koezaun sosiál, luta hasoru assimetria no kiak no halo Timor-Leste sai país ne'ebé bele fiar, nakloke no favorável ba investimentu esternu.

2 Maske Timor-Leste sei foun nu'udar Nasaun no nu'udar Estadu, ita konsege hakat dook. Husi pós-konflitu ita hakat ba dezvoltimentu. Dame no estabilidade metin nafatin. Nu'udar Nasaun no Estadu soberanu hamutuk ita bele tuir agenda nasional foun kona-ba transformasaun ekonómika no modernizasaun sosiál. Iha buat barak ne'ebé akontese ona maibé sei iha mós buat barak atu halo iha área oin oin.

3 Iha tinan sanulu ikus, ekonomia Timor nia hetan kreximentu médiu 5% kada tinan maske efeito negativu husi krize polítika husi 2006 no resesaun internasionál, ekonómika no finanseira iha 2007/2008, ne'ebé sei iha impaktu to'o agora. Maske konsidera nu'udar País dezvoltimentu, Primeiru-Ministru, Kay Rala Xanana Gusmão, foka ba investimentu estratéjiku iha enerjia elétrika, ne'ebé fó benefísiu ba 80% husi família sira. Infraestrutura sira iha rai laran hanesan estrada, ponte, eletrisidade, bee moos, klínika, eskola, hahú fó benefísiu ba ema barak iha territóriu nasional tomak, tanba harii ambiente ne'ebé di'ak ba kreximentu husi setór privadu, reforma husi setór públiku no investimentu ba

ema. Ita konsege atinje estabilidade makroekónomika ho inflasaun ki'ik no hadi'a rendimentu husi família sira ne'ebé, tuir PIB per capita, sai dobru duke iha tinan sanulu liu ba. Nu'udar ezemplu, iha 2002, ita nia PIB per capita la'ós petrolíferu mak \$651 no liu tinan sanulu resin rua, aumenta ba \$1.004, ne'ebé representa kreximentu husi 54%. Nune'e ita aumenta ita nia baze ekonomia maske sei neineik.

4 Kreximentu ekonómiku no intervensaun estratéjika sira loke dalan atu hamenus índise pobreza, no pobreza tun husi maizumenus 50% iha 2008 ba 41,8% iha 2014.

5 Timor-Leste halo moos progresu signifikativu iha área seluk liu kreximentu ekonómiku no redusaun ba pobreza. Ida ne'e inklui instituisaun ba kredibilidade internasionál EITI. Ohin loron Timor-Leste hanesan referénsia kona-ba demokrasia, liberdade espresaun no jestaun husi fundu soberanu.

6 Área ne'ebé hetan investimentu liu mak infraestrutura. Ita hatene katak infraestrutura sira ne'ebé adekuaudu no modernu mak loke dalan hodi bele atinje objetivu husi transformasaun ekonómika. Nia rezultadu mak ita konsege halo jestaun di'ak ba krize sira ne'ebé akontese iha ita nia rai no harii nafatin baze ba kreximentu. Daudaun ita iha aeroportu iha kosta Súl no ida seluk iha Rejiaun Administrativa Espesiál Oe-Cusse Ambeno (RAEOA). Ita aumenta no halo modernizasaun ba rede estrada.

7 Ita hola mós desizaun estratéjika sira iha setór sosiál kona-ba apoiu ba família sira ne'ebé presiza liu. Ida ne'e inklui espansaun ba protesauun sosiál ho objetivu atu hetan kobertura universál.

8 Kona-ba kapasitasaun ita halo investimentu boot iha sistema edukasaun. Objetivu nafatin atu harii abilidade sira ne'ebé nesesária ba ekonomia foun. Liu husi harii Fundu Dezenvolvimentu Kapítal Umanu, ami hahú programa bolsa estudu, konsesaun públika no merenda eskolár iha eskola sira atu fó ba alunu sira.

9 Ita hetan mós progresu iha esforsu reforma hodi Timor-Leste sai atrativu liu tan ba setór privadu. Esforsu sira ne'e hetan ona rezultadu. Kapitalizasaun

husi ita nia setór privadu, liu liu husi ita nia empreza sira, sai hanesan preokupasaun no daudaun ita konsege harii asesu ba rekursu finanseira hodi fó estímulo ba konkorensia, ita harii polítika janela únika liu husi ajénsia SERVE.

10 Maske nune'e sei iha dezafiu boot no dezafiu balu ne'ebé hahú mosu.

11 Kontestu globál hatudu mós dezafiu. Desde 2014 mina rai nia folin tun no ida ne'e la fó benefísiu ba Timor-Leste.

12 Maibé ita hotu hamutuk. No unidade ida-ne'e mai husi ita-nia vizaun komún, hodi ***kontinua harii rain ida inkluzivu, justu, ho oportunidade hirak hanesan ba sidadaun timoroan hotu.***

### **13 Propózitu ba governasaun durante tinan lima oinmai:**

14 Objetivu polítiku importante liu ba Governu ne'e mak halo governasaun ba ema hotu, ba Povu, no hatán ba sira-nia mehi boot liu, kona-ba hetan kualidade ba moris di'ak liu, edukasaun di'ak liu, saúde di'ak liu, asesu di'ak liu ba enerjia no bee moos, hahán ho kualidade liu, hela-fatin ho dignidade, no nune'e hatán ba determinasaun konstitusionál sira. Estabelese fronteira sira-nia limite definitivu no sira-nia defeza mak sai daudaun, no nafatin, prioridade ida boot tebes atu garante soberania husi ita-nia rain.

15 VII Governu Konstitusionál foti kompromisu atu: kombate izolamentu husi populasaun, kria infraestrutur hira ho kualidade, dinamiza prestasaun ba servisu públiku sira, fó atensaun espesial ba medida asaun sosial sira no prestasaun ba kuidadu saúde nian, servisu ba dezvoltimentu husi ekonomia ida ho kualidade ne'ebé bele hamosu retornu pozitivu sira ne'ebé evidente hodi hasa'e kondisaun moris ba timoroan hotu.

16 Atu kombate izolamentu, ami sei kontinua hela esforsu sira iha Autoridade Rejiaun Administrativa Espesial Oe-cusse Ambeno, hodi dezvoltolve meu komunikasaun sira ne'ebé bele habadak distansia entre enklave no Atauro ho fatin sira seluk rain nian.

17 Daudaun, área krítika sirahusi ita-nia sosiedade mak edukasaun, saúde, empregu no pobreza. Ezekutivu ne'e propoin implementa modelu

dezenvolvimentu globál no integradu foun, atu dudu fali ekonomia no medida konkretahodi kria empregu, ne'ebé hamriik iha konsolidasaun ba finansas públikas.

18 Ami sei kontinua prosesu konstrusaun ba Timor-Leste ne'ebé inkluzivu, justu no próspere liu, ho oportunidade hanesan ba ema hotu, tuir ajenda transformasaun husi Planu Estratégiku ba Dezenvolvimentu (PED) no tuir Objektivu Dezenvolvimentu Sustentável (ODS).

19 La fásil konkretiza Vizaun ida-ne'e se karik laiha envolvimentu husi populasaun, aossiasaun sira no setór privadu. Ami hakarak mak haree sidadania, asosiasaun sivil, no setór privadu ne'ebé forte liu ho kapasidade atu hahú no dezenvolve asaun sira.

20 Ita presiza hadi'ak koordenasaun entre governu sentráal no munisípiu sira. Ita presiza implementa mudansa no reforma hirak ne'ebé nesesáriu atu garante katak Estadu no ninia administrasaun públika sei hatudu efisiénsia, efikásia no orientasaun ba rezultadu no ba rezultadu ho qualidade.

## **21 Objektivu sira ba governasaun durante tinan lima oinmai:**

### 22 SETÓR SOSIÁL

1. Asesu ba ensinu ho qualidade ba ema hotu
2. Asesu ba servisu saúde nian ho qualidade ba ema hotu
3. Apoiu ba ema vulnerável sira
4. Dezenvolvimentu sustentável ba jerasaun hotu
5. Indústrria kreativa ne'ebé ativa liu no promosaun kultura nasional
6. Foin-sa'e sira ho saude, instrusaun no ho valór étiku sira

### 23 DEZENVOLVIMENTU HUSI INFRAESTRUTURA SIRA

7. Hasa'e kapasidade produtiva no hasa'e PIB potenciál
8. Hadi'a ema sira nia asesu ba servisu sira

9. Hasa'e sustentabilidade husi infraestrutura sira

#### 24 DEZENVOLVIMENTU HUSI SETÓR EKONÓMIKU

10. Hasa'e produsaun agríkola

11. Dezenvolve indústrria husi rekursu naturál sira

12. Hasa'e rendimentu liuhusi kriasaun ba empregu

13. Ambiente ne'ebé favoravel ba diversifikasaun ekonómika

#### 25 MODERNIZASAUN INSTITUSIONÁL

14. Garantia ba defeza, seguransa no estabilidade nasional

15. Garantia ba sistema justisa ida ne'ebé asesivel no efetivu

16. Timor-Leste nia integrasaun no pozisaun global

17. Haforsa kultura demokrátika liuhusi responsabilizasaun no transparénsia

18. Jestaun ba setór públiku ho efikásia, efisiénsia no responsabilidade

26 Governu Konstitusionál VII mosu tuir rezultadu eleitóral ida iha-ne'ebé Povu hato'o momoos ninia vontade atu iha governasaun ida ho kompromisu permanente sira entre forsa polítika oioin ho asentu parlamentár. Governu ne'e hatudu duni esénsia husi ideia ida-ne'e, tanba maski konstitui ho koligasaun entre partidu rua, FRETILIN no PD, mós ba foti ema ne'ebé iha valór husi área polítika sira seluk ho representasaun iha Parlamentu Nasionál, ka mós ema independente sira. Nune'e, VII Governu Konstitusionál sei tuir ideia kompromisu permanente ida-ne'e, no hamutuk área polítika hotu, durante implementasaun ba ninia mandatu, to'o 2022.

## **I ÁREA SOSIÁL**

27 Konstituisaun husi Repúblika Demokrátika Timor-Leste nian estabeselese momoos katak Estadu tenke garante ba sidadaun hotu sira-nia direitu ba **edukasaun**, hodi promove igualdade ba oportunidade sira. Direitu ba edukasaun

mak sai hanesan pilar ba sidadania no kondisaun esensiál ida atu dezenvolve sosiedade ida ne'ebé justa, próspera no solidária.

28 Nune'e, fundamentál loos iha sistema edukativu ida ne'ebé bele prepara ita-nia sidadaun sira, ho forma adekuada no kompetente, hodi hasoru ezijénsia sira husi mundu globalizadu daudaun, ne'ebé iha kompetisaun ekonómika-finanseira boot tebes. Hanesan hetete iha Planu Estratéjiku ba Dezenvolvimentu 2011-2030 (PED 2011-2030), sistema ba ensinu tenke garante katak ita-nia Rain bele iha kapasidade atu implementa estratéjia ba diversifikasaun ekonómika no ba dezenvolvimentu sustentável, ne'ebé la iha dependénsia boot liu ba reseita petrolífera sira.

29 Governu ne'e iha intensaun atu implementa medida hirak ne'ebé bele garante qualidade ba ensinu, igualdade asesu ba eskola pública no hamenus insusesu eskolár husi estudante sira, liuliu ba Ensину Báziku, ne'ebé konsagradu iha Lei Baze sira hanesan universál, obrigatóriu, no kuandu posível, gratuitu. Atu kumpre ida-ne'e, Governu ne'e sei haforsa parseira iha domínio ne'e ho Igreja katólíka no ho konfisaun relijioza sira seluk, atu bele buka nafatin qualidade iha ita-nia Edukasaun.

30 Ho relasaun ba **Edukasaun Pré-Eskolár**, sistema ba ensinu ne'e hatudu katak labarik sira ho otas entre 3 to'o 5 ladún tama iha eskola, tanba infraestrutúra eskolár sira ne'ebé disponível sei limitadu tebes. Nune'e, presiza duni kria kursu formasaun inisiál ba Edukadór Infánsia sira tanba seidak iha.

31 Asesu ba Edukasaun Pré-Eskolár sei konstitui fatór esensiál ida atu bele hamenus insusesu eskolár ba estudante sira, iha 1.º no 2.º siklu ensinu báziku nian. Ita tenke konsidera dezafiu hirak ne'ebé identifika nu'udar investimentu ida, tanba vantajen sira husi fornese Edukasaun Pré-Eskolár ho qualidade bele hamosu fali retornu edukativu, ekonómiku no sosiál importante.

32 Governu sei halo esforsu boot atu aumenta asesu ba Edukasaun Pré-Eskolár, liuhusi hasa'e númeru husi infraestrutúra no ekipamentu eskolár no iha formasaun inisiál ba profesór sira foun. Hodi bele hasa'e qualidade ba nível ensinu ida-ne'e, sei atu kontinua Programa formasaun kontínua ba profesór sira

kona-ba konteúdu kurrikulár, Programa ba Merenda no Konsesaun eskolár no ba avaliasaun no akreditasaun husi eskola sira ho edukasaun pré-eskolár.

33 Ho relasaun ba **Ensinu Báziku**, ninia dezafiu prinsipál mak qualidade ba ensinu. Ho objetivu atu koko rezolve kestaun ida-ne'e, aleinde hasa'e númeru eskola no sala eskola nian, hamenus númeru estudante ba turma idaidak, garante distribuisaun husi oráriu no turnu hirak iha eskola sira, mós prezisa halo preparasaun di'ak loos ba rekursu umanu iha edukasaun hodi sira bele hanorin no hala'o eskola sira ho kompeténsia.

34 Nune'e, ho objetivu atu garante katak estudante hotu bele remata ensinu báziku liuhusi edukasaun ho qualidade, ne'ebé bazeia ba aprendizajen oioin hanesan domínio ba lian ofisiál sira, matemátika, informátika, siénsia sosiál, siénsia naturál, arte, lian estrangeira sira, edukasaun fízika no sidadania, Governu iha intesaun atu haforsa númeru husi infraestruturá no ekipamentu eskolár, intensifika formasaun kontínua ba profesór sira kona-ba konteúdu kurrikulár no ba domínio husi kompeténsia obrigatóriu haat, hasa'e kualifikasaun ba profesór sira ne'ebé laiha abilitasaun akadémika adekuada atu hanorin no valoriza atividade atu aumenta variedade interese kurrikulár, ho integrasaun kompleta iha planu pedagójiku husi eskola sira no hodi kontribui atu harii prinsipiu kona-ba "Eskola ho tempu inteiru".

35 Governu sei haktuir Programa ba Merenda no ba Konsesaun eskolár sira, no atu suporta ida-ne'e pretende kria Fundu Espesiál ida atu garante ninia ezekusaun konstante.

36 Ho relasaun ba **Ensinu Sekundáriu**, ho vertente jerál no tékniku-vokasionál, ita bele identifika nesesidade atu hasa'e asesu ba ensinu no atu promove qualidade ensinu husi profesór no estudante sira.

37 Ho relasaun ba ensinu tékniku-vokasionál, prezisa duni haluan no diversifika oferta, hodi nune'e kontribui atu hamenus abandonu eskolár no dezenvolve kapasidade sistema nian hodi permite estudante hotu atu estuda to'o nível aas liu.

38 Ho finalidade atu promove nível ensinu ida-ne'e no atu permite ba estudante hotu hetan oportunidade hodi dezenvolve kompeténsia prátika hirak ba integrasaun di'ak liu iha sociedade, asesu fásil liu ba merkadu servisu nian no kapasidade liu ba empreendedorizmu, Governu ne'e sei kontinua hasa'e qualidade ba infraestrutura eskolár sira no sei intensifika formasaun kontínua ba profesór sira kona-ba konteúdu kurrikulár, mak hanesan ema sira ne'ebé hanorin dixiplinahusi área produtiva iha Ensinu Sekundáriu Tékniku-Vokasionál.

39 Governu sei atu avalia mapeamentu daudaun kona-ba oferta pública ba Ensinu Tékniku-Vokasionál ho objetivu mak evita fahe rekursu sira no atu promove ninia aliñamentu ho Polu Rejionál sira ba desenvolvimentu.

40 Liután ida-ne'e, Governu mós pretende estuda oinsá haluan oportunidade oferta ba kursu ho kualifikasaun espesífika no profisionál no haforsa mekanizmu hirak atu halo ligasaun entre eskola no empreza sira hodi bele fó apoiu ba estajiáriu sira durante sira-nia formasaun iha kontestu servisu nian.

41 Ho relasaun ba **Ensinu Rekorente**, dezafiu ida boot liu ba nível ensinu ida-ne'e mak difikuldade atu halo koordensaun ba atividade hirak iha nível sentráal no munisipál, tanba atividade barakliu hala'o iha nível komunitáriu no autoridade lokál sira ladún foti responsabilidade ba asuntu ne'e.

42 Governu pretende implementa asaun hirak atu hamoris fali edukasaun no formasaun ba adultu sira, nu'udar pilarhusi sistema ba kualifikasaun, no nune'e garante kontinuasaun husi polítika ba aprendizajen durante moris tomak.

43 Governu mós sei kontinua nafatin ho implementasaun husi programa ba Alfabetizasaun no ba Pós-alfabetizasaun no, ho objetivu atu haforsa oferta ba ema sira ne'ebé liu idade eskolár no iha tempu uluk la hetan oportunidade atu tama iha ensinu regulár, atu haforsa implementasaun husi Programa Ekivalénsia ba Ensinu Báziku.

44 No liután ne'e, iha nível ensinu ida-ne'e, Governu pretende haforsa no formaliza kriaun husi Sentru Komunitáriu ba Aprendizajen sira iha munisípiu



hotu hodi sai nu'udar ajente ligasaun atu dinamiza atividade ba ensinu rekorente.

**45 Ensinu Superiór** hasoru dezafiu oioin, mak ho relasaun ba kualidade ensinu nian no ho taxa empregu ki'ik husi graduadu sira. Atu hatán ba kreximentu maka'as husi númeru estudante, instituisaun barak la kumpre ho kritériu mínimu ba kualidade, ho nível rekursu materiál, laiha kuadru profesór ne'ebé adekuaudu no la kumpre oráriu kurrikulár mínimu.

46 Nune'e, Governu pretende haforsa no fortalese Ajénsia Akreditasaun no Avaliasaun Akadémika (ANAAA) nia knaar, hodi instituisaun ne'e bele hala'o ninia kompeténsia ba avaliasaun no akreditasaun akadémika ho forma efetiva, transparente no independente.

47 Importante loos investe ba Ensinu Superiór ida ho kualidade atu garante sustentabilidade ba dezvoltimentu nasionál, liuhusi formasaun ba rekursu umanu sira ho kualifikasaun, no, tanba ida-ne'e, Governu pretende prepara no aprova Polítika ba Jestaun no Organizasaun husi Ensinu Superiór, ne'ebé estabese orientasaun hirak kona-ba diversifikasaun ba oferta edukativa, kumprimentu husi kurríkulu ho Padraun Mínimu no husi lian ofisiál sira no prinsípiu sira kona-ba finansiametu ba ensinu superiór públiku no mós ba ensinu superiór privadu, kuandu ikus ne'e konsege hatán ba prioridade nasionál sira.

48 Ho relasaun ba Ensinu Superiór Tékniku, Governu pretende haforsa kondisaun oras daudaun husi Institutu Politékniku Betanu nian no diversifika oferta, liuhusi harii Institutu Politékniku ba Otelaria no Turizmu foun, iha Lospalos, no Akademia ba Peskas no Estudu Mariñu, iha Manatutu.

49 Governu mós pretende haktuir Programa Bolsa Estudu nian, liuhusi Fundu Dezvoltimentu Kapítal Umanu, iha área prioritária no estratéjika sira ba dezvoltimentu nasionál, mak iha rain husi Komuidade Rain Ne'ebé Ko'alia Lia-Portugés (CPLP) no husi Asosiasaun Nasoins Sudeste Aziátiku (ASEAN).

50 Atu bele garante kondisaun hirak indispensavel hodi atinje meta ba qualidade ensinu nian, Governu ne'e sei implementa tan **medida no asaun transversál ba nível ensinu hotu.**

51 Governu pretende kontinua ho implementasaun husi Sentru Aprendizajen no Formasaun Eskolár, nu'udar eskola modelu, halo revizaun kona-ba parámetru avaliasaun ba dezempeñu husi Edukadór Infánsia sira no profesór sira, implementa sistema rekrutamentu no kolokasaun husi profesór sira, tuir nesesidade iha Kuadru pesoál eskola sira-nian, no promove asaun formasaun ba administradór no jestór eskolár sira.

52 Ho objetivu atu hasa'e asesu ba eskola, Governu pretende avalia mapeamentu eskolár daudaun, hodi bele harii dormitóriu ba estudante sira ho hela-fatin dook loos husi eskola no atu implementa programa Transporte eskolár iha fatin hirak ne'ebé prioritáriu.

53 Governu mós sei promove medida hirak hodi apoia Polítika Edukasaun Inkluziva, igualdade ba Jéneru, no mós kestaun kona-ba estudante foin-sa'e sira ne'ebé isin-rua sedu liu, no sensibilizasaun kona-ba problema husi violénsia iha eskola sira.

54 Kona-ba setór **Kultura** nian, Governu sei transforma setór ne'e hanesan feramenta transversál ba edukasaun no prosesu aprendizajen husi valór ho relasaun ba identidade nasional, sidania no respeito mútuu.

55 Dokumentasaun ba koñesimentu, espresaun no elementu kulturál oioin ne'ebé bele karakteriza ita-nia rain sei sai prioridade ida ba Governu ne'e no, liután ida-ne'e, mós hanesan prioridade halo investimentu ba formasaun husi kuadru tékniku no superiór sira no ba investigasaun iha área relevantehusiSetór Kultura nian.

56 Aleinde ida-ne'e, mós fundamentál fó importánsia ba valór patrimoniál sira ne'ebé konsititui baze identidade ba ita-nia rain – ne'ebé inklui espresaun arkitektónika, artezanatu, múzika tradisionál, estória orál no lian, nu'udar meu tranzmisaun koñesimentu sekulár nian - atu nune'e bele salvaguarda, disfruta no divulga valór hirak-ne'e.

57 Governu mós sei promove dezvoltimentu institusionál ba Setór Kultura nian, liuhusi apoia kriasaun no dezvoltimentu sustentável husi Biblioteca ida no Museu Nasionál sira, Akademia ba Arte ida no Indústria Kriativa Kulturál sira, Institutu ba Patrimóniu Kulturál ida no Sentru Kulturál iha Munisípiu sira.

58 Estadu iha mós kompeténsia atu estimula kriatividade no kuriozidade artístika, no nune'e Governu sei fó importánsia espesial ba ensinu formál no la formál kona-ba arte, liuhusi dezvoltimentu ba programa kurrikulár no ho forma ba ensinu espesífiku oioin, no mós ho apoiu ba instituisaun no indivíduu sira ne'ebé hatudu méritu rekoñesidu ka vokasaun artístika.

59 Governu sei implementa polítika kulturál ida ne'ebé koerente, ho respeito ba espesifisidade estórika no jeográfika hirak husi kontestu rain-nian. Nune'e, no aleinde fó apoiu ba lian ofisial no nasional sira, mós atu fó relevánsia partikulár ba relasaun estórika, kulturál, linguística no artístika, ne'ebé inklui múzika, ho Komunidade Rain Ne'ebé Ko'ali Lia-Portugés (CPLP), no mós atu hametin ligasaun ho rain iha rejaun ne'e, ne'ebé inklui rain husi Asosiasaun Nasoins Sudeste Aziátiku (ASEAN) no Pasífiku nian.

60 Ho relasaun ba área **Saúde**, ami-nia aposta forte liu mak haforsa kapasidade resposta no governasaun husi Servisu Nasionál ba Saúde, hodi bele garante kobertura nasional universal ba rain ho kuidadu saúde primáriu ho qualidade no promove utilizaun adekuadahusikuidadu ospitalár, ho konsiderasaun ba sidadaun nu'udar foku prinsipál.

61 Governu sei presiza organiza fali **Servisu Nasionál ba Saúde**, hamutuk lejislasaun apropiada, hodi garante asesu efetivu no qualidade ba prestasaun kuidadu saúde nian ne'ebé preventivu, promocional, kurativu no ba rehabilitasaun.

62 Atu hasa'e qualidade ba atendimentu médiku espesializadu no atu solusiona dezafiu hirak asiadu ho transferénsia husi paciente sira ba tratamentu médiku no ba liur, Governu ne'e kompromete haforsa kapasidade téknika husi ospital sira, ho aposta iha autonomia no responsabilizasaun ba jestaun integrada, no iha koordenasaun entre funsaun ba asisténsia, ba ensinu, ba formasaun molok no hafoin graduasaun no ba investigasaun sientífika.

63 Durante tinan hirak oinmai, Governu sei buka institucionaliza **Saúde iha Família**, liuhusi polítika foun atu armoniza servisu sira no programa sira ba saúde, ho konsiderasaun ba nesesidade saúde hotu husi indivíduu durante ninia siklu no faze moris oioin, no husi ninia hela-fatin to'o nível prestasaun ba kuidadu saúde nian aas liu.

64 Nune'e, ba protesaun saúde públika nian ami atu:

- Fó énfaze iha promosaun ba saúde no edukasaun ba saúde, ho envolvimentu husi eskola sira, comunidade no sosiedade sivil durante kampaña sensibilizasaun kona-ba hahalok no meu moris saudável;
- Fó atensaun esepiál ba doensa kardiovaskulár sira, diabetes no patolojia onkolójika, no mós ba moras ne'ebé bele hamosu estigma sosiál boot liu, hanesan perturbasaun iha saúde mentál, infesaun VIH/SIDA no Lepra;
- Intensifika inisiativa preventiva ho relasaun ba konsumu tabaku, álkol no droga ilísita sira no ho relasaun ba komportamentu ho risku durante moras krónika no moras ne'ebé kontajiozu grave.

65 Governusei valoriza dezenvolvimentu profisionál kontínuu, liuhusi hasa'e ninia motivasaun, no ho dezenvolvimentu husi vontade servisu iha ekipa no ho garantia ba ekuidade no transparénsia iha ninia jestaun.

66 Governu sei garante disponibilidade no alokasaun ekilibrada husi ai-moruk, produktu farmaséutiku no ekipamentu médiku, no sei hadi'ak **Sistema Informasaun ba Saúde**, hodi nune'e bele halibur informasaun klínika husi utente idaidak ho rejistu ida de'it, ne'ebé permite ninia konsulta lalais no, dala ida de'it, bele mós halo preskrisaun eletrónika kona-ba ai-moruk no bele utiliza meu komplementár ba diagnóstiku.

67 Sei atu implementa mekanizmu sira hodi estimula parseria públiku-privada sira, ho aposta moos iha **parseria intersetoriál sira no ba kooperasaun**, hodi viabiliza kompartisipasaun husi setór mak fundamentál ba saúde.

68 Estória kontemporánea Timor-Leste nian mak estória kona-ba Luta ba Rezisténsia no **Kombatente ba Libertasaun Nasionál**. Daudaun, ninia

dezempeñu no entrega tenke sai nu'udar ezemplu kona-ba determinasaun no prezervasaun husi kultura, estória no identidade timoroan. Governu sei kontinua nafatin ho programa identifikasaun no pagamentu prestasaun pekuniária no pensaun sira, ho apoiu ba uma-ka'in martir sira-nian, liuhusi serimónia ho onra fúnebre hirak, ho konstrusaun ba semitériu-jardin ne'ebé fó-onra ba Asua'in sira, ho programa bolsa estudu nian ba martir no kombatente sira-nia oan sira. Iha asuntu ne'e, ami atu prioriza kriasaun husi Konsellu Nasionál Kombatente ba Libertasaun Nasionál, ho aprovasaun no proposta husi lejislasaun ne'ebé nesária atu harii orgaun lejítimu no importante ne'e, hodi halibur no hametin Kombatente hotu.

69 Iha ambitu área **sosiál**, Governu sei implementa Programa Nasionál Apoiu ba **Ekonomia Sosiál no Solidária** hodi promove koezaun sosiál no kriasaun ba empregu. Nune'e, sei presiza moderniza mekanizmu hirak ho administrasaun simplifikada hanesan "Kooperativa ho Oras" – rede ba ekonomia sosiál no promosaun atu hamosu organizasaun no inisiativa sosiál foun. Ami sei apoia valorizasaun no kapasitasaun ba empreendedór sosiál no promotór ba projetu, ho objetivu atu kria solusaun hirak foun ba problema sosiál ne'ebé identifika tiha ona, hodi nune'e dezenvolve ekonomia sosiál husi merkadu.

70 Governu ne'e foti kompromisu atu kombat kondisaun prekária no haforsa dignidade iha **servisu**: nune'e, presiza hamenus númeru husi kontratu ho prazu; hasa'e taxa konversaun husi kontratu ho prazu ba kontratu permanente; penaliza empreza ne'ebé hatudu momoos kondisaun prekária iha sira-nia relasaun laborál; promove kumprimentu husi regulamentasaun servisu nian; garante implementasaun husi protesasaun sosiál ba traballadór sira. Ami atu apresenta ba konsertasaun sosiál no atu negoseia akordu ida ne'ebé sei envolve área polítika oioin, hodi hasa'e kompetitividade no koezaun sosiál.

71 Atu implementa Estratéjia Nasionál ba Empregu 2017-2030 ne'ebé hamriik ho pilar prinsipál tolu: hasa'e nesiedade husi merkadu servisu nian; hasa'e oferta husi merkadu servisu nian no kontinua fortalese instituisaun sira husi merkadu servisu nian. Nune'e, pilar tolu ne'e inklui kria oportunidade

servisu ba foin-sa'e, ba adultu no ba feto sira, ho garantia ba prinsípiu husi igualdade ba jéneru.

72 Aleinde ida-ne'e, kualifikasaun profisionál sira ho orientasaun ba merkadu servisu nian, bele hasa'e aptidaun tékniku-profisionál husi kapitál umanu timoroan no hanesan ne'e, permite hadi'ak no hasa'e rendimentu *per capita* no ninia partisipasaun dinámika iha dezvoltamentu nasionál. Ita presiza mós enfatiza importánsia boot kona-ba partisipasaun husifeto sira ho oportunidade hanesan iha nível merkadu servisu nian, iha nível edukasaun nian no ba formasaun profisionál.

73 Planu Formasaun no Edukasaun Téknika no Profisionál ba Timor-Leste, ne'ebé hahú iha 2012, atu bele dezvoltave no orienta di'ak liu formasaun profisionál, sei kontinua nafatin atu hasa'e no dezvoltave kualifikasaun nasionál sira ho orientasaun ba merkadu servisu nian no ho konsiderasaun ba partisipasaun integrada no ativa husi indústriá importante liu. Fornesedor sira ba formasaun akreditada mak, tuir tendénsia, atu finansia no administra formasaun ne'ebé atu oferese no, hafoin, formandu sira sei hetan oportunidade atu disfruta kona-ba esperiénsia servisu nian iha fatin servisu privadu ka iha fatin servisu públiku sira.

74 Aleinde ida-ne'e, ho kolaborasaun husi ministériu relevante sira seluk, presiza mós hasa'e número traballador timoroan sira ne'ebé servisu iha liur. Koreia Súl no Austrália oferese tiha ona servisu iha liur ba traballador timoroan sira, liuhusi programa internasionál sira ne'ebé hetan suksesu no loke oportunidade di'ak ba traballador timoroan atu hetan esperiénsia profisionál, no, liután ida-ne'e, mós representa fonte rendimentu signifkativa ba sira-nia an rasik no ba sira-nia família sira, liuhusi mekanizmu atu haruka osan, ne'ebé kontribui ba dezvoltamentu sosioekonómiku rain nian.

75 Governu sei kontinua apoia projetu sira kona-ba empreendedorizmu ba ema sira ho defisiénsia, dezempregadu no graduadu sira, hodi bele hamenus taxa dezempregu nian no atu hasa'e produsaun interna iha área oioin ho potenciál ekonómiku.

76 Governu pretende halo espesializasaun kona-ba rezolusaun ba konfliktu servisu individuál no kolektivu iha fatin servisu, liuhusi mekanizmu ba mediasaun, konsiliaasaun no arbitrajén nu'udar meu extrajudisiál obrigatóriu iha rezolusaun ba konfliktu servisu individuál no fakultativu iha rezolusaun ba konfliktu servisu kolektivu.

77 Atu garante kontinuasaun ba servisu husi VI Governu Konstitusionál, Governu ne'e atu aprova no haforsa **Estratéjia Nasionál ba Protesaun Sosiál** (ENPS), hamutuk Patamár sira ba Protesaun Sosiál, no atu aprova Lei Baze Protesaun Sosiál nian. Nune'e, Governu pretende hatán ba preokupasaun hirak husi sosiedade timoroan no husi kompromisu internasionál sira – ne'ebé inklui Objektivu Dezenvolvimentu Sustentável (ODS). Medida barak la hanesan ba protesaun sosiál bele kontribui ho forma oioin hodi alkansa objektivu hitunulu ne'ebé define iha agenda 2030, liuliu meta 1.3, ne'ebé estabese kompromisu, to'o 2030, atu implementa sistema sira ba protesaun sosiál ne'ebé adekua no atinje kobertura substánsial husi ema kiak no vulnerável.

78 Iha ámbitu ne'e, presiza fó kontinuasaun ba programa sira kona-ba **Asisténsia Sosiál** ba sidadaun no família sira vulnerável liu, ne'ebé inklui, hamutuk buat seluk tan, Programa Bolsa Inan nian no apoiu sosiál pekuniáriu ba família sira ho nesesidade barakliu. Liután, mós prioritáriu halo avaliasaun, no hafoin revizaun, ba programa sosiál hirak-ne'e hodi bele kombate pobreza no tuir nesesidade hodi garante padraun mínimu ba dignidade sosiál husi sidadaun hotu.

79 Iha ámbitu **Seguransa Sosiál**, Governu atu haforsa Sistema Seguransa Sosiál, ne'ebé inklui Rejime Kontributivu no La Kontributivu, no artikulasaun entre rua-ne'e, mak bazeia ba prinsípiu garantia Protesaun Sosiál durante moris tomak no ba sustentabilidade ekonómika no sosiál.

80 Iha ámbitu **Servisu Sosiál**, Governu foti kompromisu atu hasa'e koordinasaun entre área sosiál oioin (edukasaun, sa'ude no protesaun sosiál) no ninia relasaun ho área servisu nian no ba produtividade.

81 Governu ne'e sei implementa diploma ne'ebé estabese relasaun entre Estadu no Instituisaun sira ba Solidariedade Sosiál, ho promosaun husi parseria

atu hakbesik instituisaun sira-ne'e, no sei fó atensaun espesiál ba labarik sira, ho kompromisu atu kontinua nafatin ho esforsu atu aprova no implementa Lei Protesaun Labarik nian.

82 Governu mós pretende hadi'a koordenasaun interministeriál no servisu hamutuk organizaun ba sosiedade sivil sira, hodi bele implementa **Polítika Nasionál ba Defisiénsia** no garantia ba protesauun sosiál husi sidadaun ne'ebé hasoru defisiénsia ruma, no aleinde ida-ne'e mós fó insentivu ba sira-nia partisipasaun ekonómika no sosiál iha desenvolvimentu husi sosiedade ida ne'ebé tenke inkluziva.<sup>83</sup> Mós atu kontinua apoia sosiedade sivil liuhusi apoiu ba projetu komunitáriu sira, nu'udar kontribuisaun ba desenvolvimentu husi atividade sósio-ekonómika, kulturál, relijioza no ekonómika, hodi promove ninia sustentabilidade no, nu'udar konsekuénsia husi ida-ne'e, hasa'e kondisaun moris ba comunidade hotu iha rain tomak. Liután ida-ne'e, mós atu mantein no implementa parseria sira ne'ebé estabelese tiha ona ho rain CPLP nian no atu apoia asaun hirak husi Fórum ba Sosiedade Sivil husi Rain Ne'ebé Ko'alia Lia-Portugés, no mós finansiametu ba ONG timoroan sira atu suporta sira-nia partisipasaun iha eventu ne'ebé sosiedade sivil aziátika mak promove.

84 Governu sei kontinua programa no asaun sensibilizasaun nian kona-ba **igualdade ba jéneru** no edukasaun sívika, liuliu ho foku ba direitu no devér sosiál, servisu no polítikuhusi indivíduu sira. Governu mós haktuir hala'ó kampaña sira kona-ba respeitu no fahe hanoin entre maluk sira no kombate ba violénsia doméstika, liuliu kontra fetu sira, no mós asaun formasaun hamutuk ho vítima sira no ho agresór sira hodi bele hamenus komportamentu ladi'ak no/ka agresivu no atu desenvolve kompeténsia pesoál atu defende an no, aleinde ida-ne'e, atu loke oportunidade ba formasaun profisionál, kria oportunidade hirak kona-ba asesu ba merkadu servisu nian, hodi nune'e bele promove autonomia finanseira no sosiál ba indivíduu sira ne'ebé identifika tiha ona nu'udar vulnerável ba violénsia fízika no psikolójika (Deklarasaun Maubisse nian), liuhusi programa formasaun kona-ba finansas, kontabilidade, jestaun ba negósiu ho fetu sira, atu nune'e bele garante efikásia ba finansiametu hodi harii empreza sira ho lideransa fetu nian.



85 Kona-ba defeza **Igualdade** **ba** **Jéneru**, Governu sei garante implementasaun Planu Asaun Nasionál Kontra Violénsia Bazeia ba Jéneru tinan 2017-2021, nune'e mós ba Planu Asaun Nasionál kona-ba Feto, Pás no Seguransa no kontribui mós ba implementasaun polítika Orsamentu Sensivel ba Jéneru.

**86 Foin-sa'e sira** mós sai prioridade ida iha dezvoltimentu sósiu-ekonómiku rain nian, no nune'e, ho parseria hamutuk Konsellu Nasionál ba Dezvoltimentu Juventude, Governu ne'e atu kria medida hirak ne'ebé bele duni promove koordensaun entre entidade pública no privada oioin, ne'ebé garante promosaun husi asaun edukativa téknika-profisionál makbele dezvoltive iniciativa atu hetan asesu ba merkadu servisu nian iha área ortikultura, pekuária, akikultura, mekánika, elektromekánika, karpintaria, no atividade servisu sira seluk, hodi bele promove autonomia pesoál no profisionál ba foin-sa'e sira no kondisaun sira ne'ebé permite harii projetu ba moris ho integrasaun sosiál no profisionál.

87 Governu mós hakarak kria kondisaun atu implementa polítika sira no atu aplika planu asaun nasional sira ne'ebé iha relasaun ho estratéjia hirak ne'ebé aprova iha polítika nasional ba juventude, no halo ligasaun husi dezvoltimentu ba insentivu hodi favorese servisu nu'udar fundamentu atu hasa'e qualidade moris nian.

88 Formasaun umana bazeia ba kompeténsia pesoál no sosiál hanesan fiar an, respeito, responsabilidade, kumprimentu ba norma sosiál sira, no seluk tan. **Desportu** mak meu ida atu haknesan no integra kompeténsia hirak-ne'e, nune'e sai hanesan área importante ida atu dezvoltive, liuliu hamutuk populasun eskolár no foin-sa'e sira.

89 Governu pretende planifika asaun hirak atu kontinua nafatin desportu eskolár iha nível nasional no desportu komunitáriu iha nível munisípiu, no mós partisipasaun iha jogu universitáriu ASEAN nian no iha Jogu CPLP nian. Liután, ami mós atu hasa'e kondisaun husi klube no instalasaun desportiva eskolár munisipál sira, ne'ebé promove atividade iha ámbitu desportu, infantíl ka juveníl, hanesan futeból, voleiból, basketeból, ténis, ténis meza nian, badminton, nst.

Governu ne'e pretende mós identifika no desenvolve talentu sira, no fó apoiu, hodi insentiva promosaun ba kompetisaun iha nível aas.

90 Iha âmbito sosiál, Governu ne'e propoin mós hasa'e moris sidadaun sira-nian iha área **Abitasaun, ho ligasaun ba ordenamentu no sustentabilidade**. Governu ne'e atu prepara no implementa Programa Nasionál ba Dezenvolvimentu Urbanu no Kapasitasaun ba Sidade sira, ne'ebé atu fó benefísiu liuliu ba sedehusi Munisípiu hotu rain nian, no nune'e promove reabilitasaun ba hela-fatin no rejenerasaun urbana, ne'ebé inklui haluan rede bee no saneamentu nian, konstrusaun husi Estasaun Tratamentu ba Bee Reziduál sira (ETAR), iluminasaun pública, prasa no fatin públiku atu halimar no pratika edukasaun fízika, fatin ho jardim no ekipamentu sosiál hotu tan ne'ebé sei nesesáriu. Ho forma graduál, programa ne'e sei inklui populasaun lubuk sira husi rain tomak, hodi garante moris ho dignidade liután ba timoroan hotu iha sira-nia hela-fatin.

91 Governu mós sei implementa, hafoin atualizasaun, **Política Nasionál ba Abitasaun** mak aprova tiha ona iha 2007 no atu azekuta **Programa Nasionál ba Abitasaun** hodi garante, iha tempu naruk, hela-fatin ho dignidade ba timoroan hotu, ho asesu ba bee moos no rezervátori, instalasaun ba saneamentu individuál (hariis fatin), fatin-te'in, eletrisidade, no nível konfortu tuir padraun modernu. Programa ne'e sei atu integra téknika moderna hirak no matériál ba konstrusaun ne'ebé apár liu ho kultura, tradisaun no klima Timor-Leste nian, no ida-ne'e ho insentivu nafatin ba comunidade lokál sira-nia partisipasaun durante prosesu tomak no atu halo konstrusaun rasik. Governu ne'e sei desenvolve mekanizmu hirak nu'udar insentivu fiskál no parafiskál atu hetan asesu ba rai urbana hodi bele harii hela-fatin, no mós sei foti medida hirak atu garante sustentabilidade financeira husi Política Nasionál ba Abitasaun. Política ne'e mós implika promove planu munisipál sira kona-ba urbanizasaun ordenada, ho rede ba esgotu, fornesimentu bee no saneamentu, eletrisidade, rekolla ba fo'er no ninia tratamentu, no mós ho konstrusaun husi bairru komunitáriu sira ho área jardim hirak iha sorisorin hotu no ho orden, ne'ebé promove ortikultura familiár no prezervasaun no protesaun ambientál. Sei atu kria Fundu Garantia nian atu iha Kréditu ba Konstrusaun ka Reabilitasaun husi hela-fatin kumunitáriu sira.

92 No mós ho relasaun ba **ambiente**, ami pretende aprova medida hirak ba protesaun no konservasaun ambientál, tuir Deklarasaun Paris nian kona-ba Implementasaun Konservasaun Mudansa Klimátika no haktuir nafatin ho programa ba protesaun biodiversidade nian ne'ebé hahú tiha ona, ho programa ordenasaun ba reflorestasaun ho espésie balun mak promove sustentasaun ba rai no kaptasaun/retensaun bee nian, rekolla no resiklajen ba fo'er (to'o no líkidu), limpeza ba tasi-ibun no kombate poluisaun iha tasi, ár no rai, saneamentu báziku iha munisípiu sira, fornimentu bee nian, hamenus utilizaun ba ai-sunu, liuhusi promove utilizaun ba fogaun ho rai-mean, rekursu ba enerjia renovável sira, no medida sira seluk tan durante prazu badak no naruk.

## II DEZENVOLVIMENTU HUSI INFRAESTRUTURA SIRA

93 Governu sei kontinua utiliza reseita sira husi Fundu Petrolíferu, ho sustentabilidade, atu finansia investimentu produtivu ba infraestrutura fízika sira, liuhusi ligasaun metin liu entre infraestrutura no setór ekonómiku prioritáriu sira, ne'ebé permite retornu ekonómiku ne'ebé konsistente liu, tanba bele aumenta dalan asesuho konstrusaun ba estrada sira ka ho utilizaun husi transporte marítimu no aéreu sira, no presiza mós harii infraestrutura sira ne'ebé bele ajuda aumenta área produsaun oioin.

94 Hamutuk ho ida-ne'e, Governu ne'e mós atu promove hasa'e sistema jestaun ba investimentu públiku sira, no mós hasa'e qualidade ba infraestrutura sira ne'ebé harii tiha ona, liuhusi haforsa konkorensia iha ekonomia ho prosesu akizisaun públika ne'ebé kompetitivu liu.

95 Aleinde fó atensaun maka'as ba investimentu sira iha área moris seluk tan rain nian, Governu ne'e mós atu promove **infraestrutura ekonómika moderna no estrajéjika**, ne'ebé atu harii ho qualidade, ho relasaun kustu-benefísiu apár ho kontestu dezenvolvimentu no rezultadu efetivu, hodi bele suporta no apoia movimentasaun lojístika lalais no eficiente ba ema no bein hirak tuir kuadru investimentu privadu nian.

96 Nune'e, Governu ho konxiénsia kona-ba importánsia atu hasa'e kualidade husi despeza públika sira ba infraestrutura no husi prosesu desizóriu, sei fó prioridade ba desenvolvimentu husi infraestrutura estratéjika hirak ne'ebé apár ho prioridade sira ba diversiifikasaun ekonómika, sei halo revizaun no reforma ba sistema jestaun husi investimentu públiku sira, hodi haforsa kapasidade avaliasaun ba projetu potenciál iha Sekretariadu ba Projetu Boot no mós iha Ministériu relevante sira ho responsabilidade ba desenvolvimentu husi infraestrutura sira; sei haforsa koordenaun entre projetu sira atu harii estrada rurál no **planu desenvolvimentu sektoriál** ba Kafé no Turizmu; no sei hasa'e finansiamentu ba manutensaun husi ativu sira ba infraestrutura ne'ebé iha tiha ona no sei atu harii.

97 Governu sei implementa projetu sira ba desenvolvimentu husi **Rede Rodoviária** rain nian ne'ebé iha daudaun, hanesan halo konstrusaun, reabilitasaun no manutensaun ba estrada; konstrusaun fali husi estrada nasionál no munisipál, tuir padraun internasionál sira; konstrusaun husi infraestrutura rodoviária ne'ebé nesesáriu atu apoia desenvolvimentu ba Kosta Súl, kontinua harii infraestrutura ba estrada sira iha RAEOA, ba rede abastesimentu nian, ba rede eskolár, ba ponte no Sentru Saúde nian, ba infraestrutura agríkola sira, nst. Governu ne'e sei fó prioridade ba desenvolvimentu husi **estrada rurál sira** atu tama no loke asesu ba lokalidade sira, ho perspetiva abordajen kona-ba "Estrada ba Desenvolvimentu", ne'ebé la'o tiha ona, no tuir rekomendasaun sirahusi Planu Diretór ba Estrada Rurál.

98 Governu sei promove "**asesu ba bee** ne'ebé suficiente, seguru, aseitável, ho asesu fíziku no ho folin razoável ba konsumu pesoál no doméstiku", ba Timoroan hotu.

99 Governu mós sei promove desenvolvimentu husi empreza sira iha setór Bee no Saneamentu nian, harii Empreza Munisipál no Inter-Munisipál ba Bee no Saneamentu no atraí setór privadu atu halo Parseria Públiku-Privada sira (PPP) no jestaun ba konsesaun sira; atu kria kondisaun hirak atu implementa regulasaun téknika no ekonómika efetiva ba setór bee no saneamentu no desenvolvimentu husi sustentabilidade no autonomia institusionál ba setór ne'e.

100 Governu sei promove konstrusaun husi barrajen retensaun bee superfisiál ba **irigasaun** no protesaun husi sentru urbanu ho situasaun krítika; atu identifika fonte bee foun, ne'ebé inklui dessalinizasaun, konstrusaun husi rezervatóriu hirak, instalasaun husi **sistema tratamentu bee nian** iha fatin balun rain nian.

101 Governu mós sei aprova lejislasaun apropiada hodi **organiza fali setór elétriku** no atu implementa ninia planu; sei aprova no implementa Polítika Tarifária ida ne'ebé inklui tarifa la hanesan tuir tipu konsumidór oioin, hanesan kliente partikulár, komersiál no industriál sira; sei hala'o estudu sira atu estrutura fali **EDTL - Eletricidade de Timor-Leste**, hodi hasa'e ninia efisiénsia operasionál no ekonómika; atu atrai setór privadu ba setór enerjia rain nian; sei hala'o estudu hirak kona-ba viabilidade atu hatama solusaun balun kona-ba enerjia alternativa; no sei inklui fonte kombustível foun ba produsaun husi enerjia elétrika, hanesan gás naturál.

102 Governu sei enkomenda prepara, no hafoin sei aprova, Planu Diretór ba **Aeroporto Internasionál "Presidente Nicolau Lobato"** iha Díli no ba **Aeroporto Internasionál iha Baucau** (ida-ne'e ba Forsa Aérea no ba Turizmu), ne'ebé inklui reabilitasaun ba sira-nia pista no habelar fatin (ba aeroportu Díli nian); no mós estudu viabilidade kona-ba **aeródromu munisipál sira**, tuir koordinasaun ho Planu Diretór ba aeroportu internasionál sira. Governu ne'e atu haforsa kapasidade husi **Autoridade Aviasaun Sivil Timor-Leste nian (AACTL)** hodi garante regulasaun efetiva ba setór transporte aéreu, no mós atu haforsa kapasidade husi **Administrasaun ba Aeroportu no Navegasaun Aérea Timor-Leste nian (ANATL)** nu'udar operadór ba aeroportu sira iha Timor-Leste, ne'ebé inklui opsaun hirak atu haforsa ninia kapasidade liuhusi mekanizmu inovadór ba kontratasaun no inovasaun. Iha área ida-ne'e, Governu mós sei respeita nafatin RAEOA/ZEESM nia autonomia administrativa, patrimoniál no finanseira.

103 Governu sei fasilita no apoia implementasaun ba Parceria Públika/Privada (PPP) iha konstrusaun ba **Portu Tíbar nian**, nu'udar alternativa ba Portu Díli nian; sei moderniza **Portu Díli nian** no ninia

konversaun hanesan Marina ba Sidade no Portu ba Kruzeiru sira; sei garante konstrusaun husi **Portu no Baze Fornesimentu ba Suai**, aleinde **Portu balun ba Peska iha Laga no Lautém, Portu Kairabela nian**, iha subdistritu Vemasse, ida-ne'e atu fasilita asesuba tasi iha Munisípiu Baucau no atu apoia turizmu. Governu ne'e mós atu promove estudu hirak atu harii **portu Manatuto nian** no atu kria liña marítima nasional ida, hodi bele fasilita transporte ba kabotajen no ligasaun kosteira, no atu fornese servisu sira kona-ba transporte marítimu ba ema no bein, entre fatin litoral oioin Timor-Leste nian. Nafatin ho respeito ba RAEOA nia autonomia, Governu ne'e mós atu koopera ho Autoridade atu dezenvolve portu komersiál RAEOA nian halo boot liután..

104 Governu mós atu haforsa **Autoridade Nasionál Komunikasaun (ANC)** iha parte institusionál, ne'ebé inklui halo revizaun no moderniza ninia kadru normativu; atu intensifika diálogu ho operadór privadu ba telekomunikasaun no nune'e garante investimentu iha ligasaun ba **kabu ho fibra óptika**; no promove disseminasaun husi asesu ba Internet.

### III DEZENVOLVIMENTU EKONÓMIKU

105 Husi restaurasaun ba independensia, ita hala'o tiha ona progresu konsideravel atu harii ekonomia merkadu nian, ne'ebé sensível ba kestaun sosiál oioin, no atu dezenvolve baze sira ba ekonomia ida ho lideransa husi **setór privadu**.

106 Governu Konstitusionál VII iha konxiénsia katak baze ba dame, estabilidade no koezaun sosiál iha Timor-Leste sei depende ba nesesidade konstante atu hasa'e kualidade moris ba Timoroan hotu, liuhusi asaun graduál atu **hamenus nível pobreza** ne'ebé sei atinje maizou menus populasaun tersu-ida. Nune'e, presiza duni haforsa pilar ba prosperidade no felisidade, ne'ebé Governu bele halo posivel liuhusi dudu fali ekonomia no servisu no atrai investimentu privadu, iha tempu ne'ebé ita loke dalan ba dezenvolvimentu inkluzivu no sustentavel. Governu ne'e mós atu hala'o programa luan kona-ba **Ekonomia Sosiál Merkadu nian** atu hasa'e rendimentu disponível ba família hotu, atu rezolve problema ba finansiamentu no atu promove oportunidade

servisu, hodi bele kombate pobreza. Governu nia servisu sei foka ba implementasaun husireforma **ekonómika sira**, ne'ebé sei hamenus taxa dezempregu nian ba númeru ho djítu ida dei't (nune'e la to'o 10%) no taxa pobreza nian ba, pelumenus, 20% to'o 2022.

107 Governu Konstitusionál VII sei hala'o Planu Estratéjiku ba Dezenvolvimentu 2011 – 2030, ne'ebé espresaun husi ambisaun Povu Timoroan nian, nu'udar rezultadu husi konsensu nasional luan. Governu ne'e atu prepara no aprova matadalan implementasaun ba PED no atu mobiliza dalan no meu hirak atu transforma Timor-Leste hanesan ekonomia ho rendimentu médiu-aas, iha 2030, ho populasaun ida ne'ebé iha edukasaun, saúde no seguransa no sei servisu atu elimina pobreza aas liu no atu estabelese ekonomia la dependente ba mina-rai ho sustentabilidade no diversidade.

108 Governu propoin harii zona ekonómika ba dezenvolvimentu 4, aleinde ZEESM TL Oekusi no Ataúru nian, bazeia ba iha esperiénsia no aprendizajen ne'ebé hetan tiha ona ho ZEESM, iha Oekusi Ambenu.

109 Asaun husi Governu iha área ekonómika inklui mós Objektivu Dezenvolvimentu Sustentável (ODS), liuliu “Objektivu 8: Promosaun ba kreximentu ekonómiku ekilibradu, inkluzivu no sustentavel, empregu di'ak no produtivu no servisu dighu ba ema hotu.”

110 Governu Konstitusionál VI promove tiha ona ritmu ida foun ba reforma ekonómika sira. Iha área barak – turizmu, agrikultura, aviasaun, jestaun ba finansas públikas – iha ona baze forte ba Governu Konstitusionál VII. Estadu foti pozisaun hanesan xumasu garantia nian ba setór privadu, iha-ne'ebé Programa Ekonómiku husi Governu Konstitusionál VII sei garante kontinuasaun husi esforsu atu reforma no diversifika ekonomia daudaun rain nian, ho Ema sira nu'udar prioridade no sentru ba asaun hirak Governu nian, hanesan ajente no benefisiáriu diretu husi progresu. Governu sei promove kreximentu ekonómiku forte no sustentavel ne'ebé bele benefisia populasaun lubuk hotu, maski sira-nia lokalizasaun jeográfika.

111 Kreximentu ekonómiku husi rain tenke la'o nafatin apár ho **kriasaun ba servisu** no promosaun ba **koezaun sosiál**, ho preokupasaun no promosaun ba

**ekilíbrü ambiental.** Ida-ne'e mak sentidu husi konstrusaun ba ekonomia ida ho dinamizmu, kompetitividade no inovasaun, no husi dudu fali dezvoltimentu sustentavel, ho prosperidade ba ema hotu no ho kapasidade atu garante moris di'ak liu ba Timoroan hotu, no ho oportunidade ba jersaun oinmai atu sira mós bele hatán ba sira-nia nesesidade.

112 Ba ida-ne'e, Governu Konstitusionál VII sei koordena solusaun hirak atu **promove ekonomia transversál ho governasaun**, hodi bele trata kona-ba kestaun fundamentál hirak ne'ebé iha relasaun ho prestasaun servisu báziku ba populasaun no polítika makroekonómika, no hodi promove estratéjia atu diversifika ekonomia, ne'ebé inklui intervensaun hirak atu hasa'e oportunidade ba negósiu sira, hasa'e asesu ba kréditu, hasa'e investimentu no komérsiu no dezvoltolve setór produtivu Timor-Leste nian, ho asaun hirak iha eixu tuirmai: Dezenvolvimentu ba Setór Ekonómiku Prioritáriu; Promosaun no Fasilitasaun ba Negósiu; Promosaun ba Investimentu no Abertura ba Merkadu Esportasaun; Haforsa Kapasidade ba Instituisaun Públika sira no Setór Ekonómiku; Promosaun Ekonomia Sosiál Merkadu nian; Dezenvolvimentu Rurál; no Dezenvolvimentu ba Infraestrutúra Ekonómika sira.

113 Ba **deztvolvimentu sektoriál** presiza halibur rekursu finanseiru no umanu sira. Estratéjia ida-ne'e foka ba setór ekonomia tolu – **agrikultura no peskas, turizmu no indústriá manufactureira** – iha-ne'ebé atu estimula no dezvoltolve kadeia ho valór akresentadu atu diversifika ekonomia, nu'udar prioridade sira iha mandatu Governu nian.

114 Setór la dependente ba mina-rai importante liu iha rain mak **Agrikultura**, ne'ebé okupa populasaun timoroan liu 70%. Governu sei haktuir esforsu iha dezvoltolvimentu ba agrikultura, silvikultura, pekuária no peskas, ho koerénsia liu, hodi hamenus pobreza, atu garante **seguransa hahán no nutrisiónál** no atu promove kreximentu ekonómiku no **servisu iha área rurál sira**. Governu atu investe iha kriasaun husi unidade ba produsaun integrada agro-pekuária no ba turizmu komunitáriu no rurál.

**115 Seguransa Hahán**, Governu ne'e hili hasa'e seguransa hahán no nutrisiónál nu'udar eixu sentrál ida husi ninia polítika ba dezvoltolvimentu



agráriu, ho konxiénsia kona-ba ninia impaktu ba ekonomia hotu no ba prosesu dezenvolvimentu rain nian. Hanesan ne'e, sei disponibiliza servisu ba agrikultura, ortikultura, silvikultura, irigasaun, pekuária no peskas atu apoia garantia ba seguransa hahán rain nian, no ho apoiu atu hasa'e produsaun no produtividade ba setór agrikultura no atu utiliza téknika foun ba kolleita, pós-kolleita no armazenamentu ba sereál ka ba produktu agríkola seluk ho musan, hanesan koto.

116 Governu sei insentiva ajente ekonómiku sira husi setór agrikultura atu utiliza no dissemina teknolojia rega foun no atu hatama variedade ho kualidade aas no nesesidade iha merkadu no sei atualiza kuadru legál setór nian hodi permite haluan área agrikultura ho irigasaun, no utilizaun husi rai agríkola potenciál, ho respeito nafatin ba propriedade privada. Governu ne'e sei mobiliza grupu no asosiasaun ho agrikultór sira, ne'ebé inklui foin-sa'e no feto sira, hanesan mós **kooperativa sira**, atu promove produsaun agríkola no multiplikasaun ba fini ho sertifikasaun no komersializasaun ba kultura hahán (porezemplu, foos, batar, modo no tubérkulu sira) no promosaun atu haforsa área matak ba ortikultura no frutikultura no diversifika kultura hahán ba altitude, pekuária no apikultura.

117 Governu sei haktuir investimentu ba rehabilitasaun, haluan, no/ka konstrusaun ba barrajen retensaun nian, armazenamentu no fornimentu sustentavel ba bee iha área ne'ebé presiza irigasaun, rentabiliza utilizaun kona-ba eskema irigasaun nian no ho apoiu ba agrikultura integrada iha área irigasaun potenciál foun. Hamutuk ho ida-ne'e, Governu atu promove mekanizasaun agríkola, liuhusi dissemina utilizaun ba makinaria agríkola apropiada.

**118 Kafé**, kultivu ba kafé sei envolve família timoroan liu 25%. Hahú tiha ona iha rain ne'e programa ida husi rehabilitasaun ba kafé. Parseria ida entre Governu, Asosiasaun Kafé Timor-Leste (ACTL) no parseiru dezenvolvimentu sira, loke tiha ona dalan atu prepara Planu Dezenvolvimentu ba Kafé. Governu, ho konsiderasaun nu'udar eixu prioritáriu ida, sei implementa asaun hirak kona-ba **prezervasaun ba kualidade kafé timoroan nian** no sei insentiva medida hirak

atu hasa'e ninia produsaun no produtividade hodi bele hetan aumentu signifikativu iha esportasaun no iha rendimentu sira ba família timoroan sira.

**119 Floresta**, Governu sei fó atensaun ba **Silvikultura** nu'udar subsetór ida atu hasa'e meiu subsisténsia no atu kria rendimentu ba Timoroan no sei mobiliza rekursu hirak atu implementa **Planu Investimentu Florestál**, hodi viabiliza investimentu estratéjiku no sustentavel ba setór ida ne'ebé sei atu fó benefísiu, espesiál liu, ba jerasaun oinmai. Investimentu hirak-ne'e sei inklui infraestruturá fízika sira no subsetór nia regulasaun ne'ebé nesesáriu atu apoia comunidade lokál sira no setór privadu, ho insentivu ba investimentu iha floresta sira ba esplorasau komersiál. Nune'e, atu kontinua investe iha arborizasaun, reflorestasaun no reabilitasaun ba área ho degradasaun, ne'ebé inklui kampaña sira atu kuda espésie nativa sira, hanesan ai-kameli (*Santalum album*), ai-saria (*Toona surini*), ai-naa (*Peterocarpus indicus*) no eukalíptu (*Eucalyptus globulus*). Atu bele garante jestaun integrada no sustentável ba basia hidrográfika sira, Governu sei promove haluan programa ba **jestaun Rekursu Naturál ho Baze Komunitária**, atu mantein no haforsa partisipasaun husi comunidade iha dezenvolvimentu ba setór florestál. Governu sei kontinua dezenvolve **Sistema Nasionál ba Área Protejida, Parke Nasionál no Konservasaun ba Biodiversidade**, no sei prepara Planu Jestaun Integrada no Sustentavel ba Parke Nasionál "Nino Conis Santana", Parke Nasionál "Kay Rala Xanana Gusmão" no Jardim Botániku "Francisco Xavier do Amaral".

**120 Espesiaría no Ai-horis Industriál**, Governu sei implementa programa sira ba estensaun rurál ne'ebé foka ba dezenvolvimentu husi kadeia valór ne'ebé inklui espesiaría ho produsaun iha Timor-Leste, hanesan: Pimenta, Kraviñu, Baunilla, Ai-kajú, Ai-kanela, Kinur, Ai-lia, Kolorau, nst. Bele mós mensiona produsaun ba Ai-kamii no Bambu, aleinde ai-horis industriál sira seluk ho retornu kedas atu hasa'e rendimentu liután ba Família sira. Sei kontinua promove bambu hanesan kultura komersiál atu apoia materiál renovável ba mobiliáriu. Governu sei hala'o estudu hirak nesesáriu no sei dezenvolve **Planu ba Investimentu sira** atu hasa'e produsaun ba espesiaría sira no ai-horis industriál timoroan ba esportasaun.

**121 Peska no Akuakultura,** Governu sei haktuir implementa programa sira atu apoia esplorasau sustentavel husi rekursu tasi nian, hodi bele garante, ho prazu médiu no naruk, benefísiu nutrisionál no ekonómiku ba timoroan, ho promosaun ba investigasaun no jestaun di'ak husi rekursu akuátiku ne'ebé sei moris no ho manutensaun ba konservasaun no utilizaun sustentavel husi rekursu tasi nian. Governu sei dezenvolve programa sira atu fó apoiu konkretu atu benefisia no **moderniza peska artezanál.** Liután, tuir rain nia potenciál ba rekursu peska nian, Governu mós atu insentiva dezenvolvimentu ba peska industriál, liuhusi fó lisensa ba peska atu hasa'e kaptura sustentavel no atu kria kondisaun hirak ne'ebé permite lori mai ikan no, kuandu posivel, halo ninia transformasaun iha rain ne'e. Ami mós propoin atividade hirak ba akuakultura iha fatin rurál sira ne'ebé bele hasa'e konsumu ba ikan *per capita* iha área sira-ne'e.**Pekuária no Veterinária,** Governu sei kontinua implementa planu atu hasa'e qualidade ba karau-malae, karau-timor no bibi no sei insentiva hatama tan rasa ho jene di'ak liu hodi prodús na'an no derivadu husi susubeen no atu halo kriasaun ba fahi. Governu mós atu insentiva dezenvolvimentu ba **indústria aviária** iha Timor, ne'ebé inklui atensaun espesiál liu ba dezenvolvimentu husi espésie nativa sira. Governu mós atu promove fatin ba **Servisu Saúde Animál,** ne'ebé inklui programa ba vasinasaun no tratamentu jerál ba animál sira, no sei atu hasa'e qualidade husi**Sentru Dezenvolvimentu no Treinamentu Pekuáriu,** Matadouru Nasionál Tibar nian, no Fatin Oho Animál sira seluk iha nível rejionál ho kapasidade téknika no teknolójika.

**122 Agronegósiu no Asesu ba Merkadu ho valór Akresentadu,** Governu mós fó prioridade atu haforsa **vertente empresariálsetór agrikultura nian,** liuhusi promove tranzisaun husi agrikultura subsisténsia ba agrikultura ho valór akresentadu atu fornese merkadu nasionál no ba esportasaun. Atu halo ida-ne'e, Governu sei tenke planeia no implementa **Programa Haforsa Agronegósiu,** ne'ebé inklui harii**Sentru Apoiu ba Dezenvolvimentu Agronegósiu (CADA),** ho misaun atu inklui sertifikasaun ba produktu agríkola timoroan nian hodi fornese merkadu sira. Sentru ida-ne'e atu garante implementasaun ba prosedimentu padronizadu husi**Planu Operasionál ba Kuarentena,** atu apoia **Medida**

**Kontrolu Sanitáriu no Fitossanitáriu**, ne'ebé tenke aplika ba produktu agríkola importadu no esportadu.

123 Governu sei promove atividade empreeziál sira husi produktu ho potenciál ba produsaun iha fábrica, hanesan foos (halo rahun no embalajen), nuu (transformasaun ba mina no hatama iha botir, aproveita tan ninia rezíduu sira atu prodús hahán ba animál sira), bambu (prosesamentu no ba mobiliáriu), kafé no fore-rai (prosesamentu no embalajen), ai-farina no batar (prosesamentu), no hahán animál (liuliu ba manu no akuáriu sira). Governu sei mobiliza família timoroan sira, empreeziáriu no kooperativa sira no atu promove harii empreza agríkola sira, ne'ebé bele hala'o iha kadeia valór ba agronegósio iha rain, no nune'e potencializa forneseimentu ba merkadu nasional no ba esportasaun husi produktu agríkola Timor-Leste nian.

124 Ho konxiénsia katak fundamentál hetan asesu ba rai, ho seguransa, atu hasa'e investimentu husi setór privadu iha agrikultura, Governu sei prezisa avalia Estadu nia rai ho vokasaun ba agrikultura atu bele determina parsela hirak ne'ebé bele dispoin ba setór privadu liuhusi kontratu arrendamentu nian.

125 **Investigasaun Agríkola**, Governu sei kontribui ba produsaun agríkola ho nível qualidade, produtividade no kompetitividade aas liu, ne'ebé prezisa koñesimentu intensivu hanesan, porezemplu, teknolojia foun no bioteknolojia atu hasa'e qualidade ba animál no ai-horis, no ba peskas. Tanba ida-ne'e, sei promove estudu nesesáriu no atu mobiliza parseria téknika hodi harii instituisaun públika ba Investigasaun no **Dezenvolvimentu Agráriu Timor-Leste nian**, ne'ebé sei inklui Laboratóriu Nasionál ida ba setór agrikultura no sei haforsa servisu estatística agríkola, informasaun no previzaun agroklimátika.

126 **Dezenvolvimentu Organizasionál no Enkuadramentu Legál**, Governu sei fó atensaun liu atu hasa'e kapasidade institusionál husi entidade públika sira iha setór agrikultura hodi bele implementa Programa Governu nian no atu kompleta kuadru legál no ho polítika sira ba subsetór idaidak. Ministériu Agrikultura no Peskas sei estabelese **Unidade Ekonómika no Jurídika** ida atu fornese asesoria téknika ba Ministériu.

127 Governu sei tuir prinsípiu hirak husi jestaun efisiente no transparente ba rekursu **idrokarbonetu** rain nian, hodi garante benefísiu boot liu ba timoroan no atu estimula krezimentu no profesionalizmu husi setór privadu nasionál, atu nune'e bele kompete iha merkadu rejionál no globál.

128 Rekursu minerál rain nian sei kontribui nafatin ba dezvoltimentu ekonómiku, liuhusi ajuda hetan moeda estranjeira atu finansia importasaun sira. Governu sei hanoin ba polítika sira ne'ebé bele foti valór agregadu boot liu husi indústria ne'e, liuhusi promosaun ba atividade prosesamentu juzante nian iha rain no atu hahú indústria petrokímika sira, hodi bele hasa'e di'ak liu valór ba produktu. Aleinde ida-ne'e, ho konxiénsia katak **mina-rai no gás** la'os rekursu renovavel, Governu VII sei integra polítika sira atu diversifika enerjia liuhusi diversifika matriz enerjética no hamenus nível emisaun ba gás sira ho efektu estufa.

129 Hanesan prevee iha Planu Estratéjiku Dezvoltimentu 2011 – 2030, Governu sei mantein dezvoltimentu ba infraestrutura apoiu iha kosta Súl país nian, ne'ebé lidera husi **Projetu Tasi Mane no sei kria autoridade ba administrasaun no jestaun komersiál husi projetu ne'e husi parseria entre investidór privadu sira no sei promove** dezvoltimentu plurianuál husi clusters industriál tolu, ne'ebé sei sai hanesan base husi indústria mina-rai Timor-Leste nia. Projetu inklui dezvoltimentu husi zona tasi ibun husi Suai to'o Beço no garante katak iha infraestrutura ne'ebé nesesária atu apoiu dezvoltimentu indústria petrolifera doméstika ne'ebé buras. Governu sei desenvolve **cluster sira husi Supply Base, Refinaria no Indústria Petrokímika no Gás Naturál Been**, ho forma integradu, ne'ebé aproveita potenciál husi interdependénsia entre sira.

130 Ho konxiénsia kona-ba potencialidade husi país husi ninia rekursus minerais, aleinde mina-rai no gás, governu sei prepara no halo aprovasaun ba **Kódigu Mineiru**, atu nune'e bele facilita reforsu husi indústria mineira iha Timor-Leste, sei promove investimentu no iniciativa esplorasun ba minériu sira iha Timor, hanesan Kalkáriu/Simentu, Mármore, Granitu, Osan-Mean, kobre, Manganéziu, Osan-Mutin no seluk tan no atrai investimentu iha setór ne'e, hafoin

hala'o estudu kona-ba rezerva ho interese ekonómiku ne'ebé iha iha país, no loka dalan ba esplorasaun ba pedreira sira hodi hatán ba prokura husi konstrusaun sivíl iha país no iha merkadu esportasaun.

131 Timor-Leste iha poténsia turizmu boot, ne'ebé tenke explora iha kuadru intervensaun husi setór públiku, setór privadu, sosiedade sivíl no parseiru dezvoltamentu ne'ebé, hamutuk no iha relasaun metin fó kontributu ba dezvoltamentu husi indústria turístiku ho kompeténsia operasionál ne'ebé bele garante qualidade iha prestasaun servisu, ho apoiu husi infraestrutura ne'ebé adekuada kona-ba transporte aéreu, marítimu no terrestre, no infraestrutura saúde ne'ebé apoiu ba turizmu no ba prátika desportu aleinde instalasaun otelaria ne'ebé kondigna.

132 Nune'e, governu sei promove setór turizmu nian, hodi halo indústria turizmu sai hanesan katalizadór ba diversifikasaun ekonómika iha Timor-Leste, ho poténsial hodi lori ba oin setór sira seluk ne'ebé importante ba ekonomia, hanesan agrikultura, peska, konstrusaun sivíl, indústria lijeira no artezanatu, ho valór aumenta. Governu sei halo mobilizasaun ba investimentu privadu (nasionál no estranjeiru) no envolvimentu partisipativu husi comunidade lokál iha indústria turístiku atu hadi'a kapitál ne'ebé menus.

133 Governu sei hametin kuadru legál no **regulasaun setór turizmu nian** hodi bele garante protesaun ba interese sira husi traballadór lokál, proprietáriu no investidór sira, no hakle'an estudu sira atu harii **Autoridade Nasionál Turizmu** no reforsa kapasidade planeamentu no implementasaun husi polítika no jestaun ba rekursu sira iha nivel instituisaun públika. Planu Anuál Atividade no orsamentu husi instituisaun públika sira ne'ebé iha ligasaun ba turizmu sei tuir Polítika Nasionál Turizmu.

134 Governu sei halo aprovasaun no implementasaun ba **Polítika Industriál** bazeia ba rekursu, hodi aumenta produsaun no oferta produktu husi produktu husi Timor, no mós habelar Polítika Investimentu, hodi hatán ba prokura husi oportunidade negósiu iha país. Foku industriál governu nian mak atu atrai empreza internasionál hodi mai Timor-Leste no absorsaun husi know-how no teknolojia ponta, atu nune'e estimula setór manufatura, tanba ida ne'e

importante ba apoiu enjeñaria, beins konsumu no atividade komplementár sira husi apoiu ba setór estratéjiku ne'ebé identifika ona iha Planu Estratéjiku Dezenvolvimentu 2011 - 2030 (e.g. agrikultura, esplorasau mina, turizmu no konstrusaun). Governu sei halo promosaun ba adaptasaun no adosaun ba prátika di'ak liu kona-ba Investimentu Diretu Estranjeiru (IDE) no fluksu husi koñesimentu ba empreza nasional sira, atu nune'e sira simu teknolojia estranjeiru ne'ebé hanesan dalan prinsipál ba dezenvolvimentu ba kapasidade produsaun nian iha Timor-Leste. Governu sei halo dezenvolvimentu ba **Parke Industriál iha Baía Tibar** no iha fatin seluk iha país, ne'ebé prepara atu simu empreza industriál.

135 Dezafiu boot liu ba transformasaun indústrija lijeira iha fatór significativu ba kreximentu ekonómiku Timor-Leste nian mak formasaun ba rekursus umanus ho kualifikasaun no atrasaun husi **Investimentu Diretu Estranjeiru** (IDE), tanba ne'e Governu sei promove kriasaun ba instituisaun formasaun **no Sentru Investigasaun no Dezenvolvimentu** (I & D) atu koordena no apoia dezenvolvimentu husi mikro - empreza no empreza média husi adaptasaun kriativa husi teknolojia nasional no estranjeira sira.

136 Governu mós sei fó apoiu ba estensaun ba kadeia valór atu inklui konsesaun, personalizasaun, embalajen no prosesamentu ba produktu sira, aleinde atividade aumenta valór relasiona ho enerjia, ne'ebé hetan insentivu, hanesan indústrija petrokímika no transformasaun mina rai.

137 Governu sei halo esforsu atu dudu **setór privadu atu investe iha fabrikasaun ba komponente konstrusaun sivíl nian** (hanesan simentu, betaun, ai no tijolu) iha país, atu nune'e hamenus importaun no tuir nesiedade merkadu. Konstrusaun hamosu mós servisu komplementár ba setór agrikultura, esplorasau mineira no pedreira, no turizmu país nian.

138 Kustu tranzasaun aas sai restrisaun vinkulativu ba kreximentu ekonómiku iha Timor-Leste. Kustu hirak ne'e obriga empreza sira atu halo esforsu barak liu tan hodi bele prodús bein no servisu ho presu kompetitivu iha nivel internasionál. Fortalesimentu husi **ambiente negósiu** hanesan

intervensaun transversál ne'ebé permite ba setór sira seluk atu hadi'a atratividade ba investidór nasional no estrangeiru sira. Nune'e, Governu sei fó atensaun atu hadi'a ambiente negósiu, ba setór finanseiru no ba merkadu traballu no kualifikasaun ba maun-de-obra, iha termu sira tuir mai.

139 Governu sei halo dezeñu no implementasaun programa ba prazu naruk, husi dezvoltimentu ba kapasidade atu tau matan no fó haree ba kazu disputa komersiál, atu nune'e promove aplikasaun ba Lei no ezije kumprementu kontratu bainhira parte ida ne'e iha falla. Governu sei harii Tribunál Arbitrajen ho apoiu husi tribunál ho natureza hanesan no ho kredibilidade internasionál.

140 Governu sei halo regulamentasaun husi **Lei Migrasaun no Azilu** foun, atu nune'e bele fó dalan ba prosesamentu efisiente no efikáz husi vistu ba investidór estrangeiru no traballadór estrangeiru ne'ebé kualifikadu.

141 Governu sei halo regulamentasaun ba **Lei Rai no Propriedade** atu nune'e reforsa seguransa jurídika iha tranzasaun ba propriedade no fó garantia barak liu tan ba investidór sira.

142 Governu sei dezeña no halo implementasaun ba Programa ida ne'ebé abranjente no transversál husi intervensaun husi instituisaun pública iha indikadór boot ida-idak husi "Doing Business" iha Timor-Leste, liuliu, Loke Negósiu; Harii Armazén; Ligasaun ba Eletrisidade; Transferénsia Propriedade; Garantia no Sistema Informasaun kona-ba kréditu; Direitu Atu husi Asionista Minoritáriu sira, Lei Tributária, Rezolusaun Disputa Komersiál; Insolvénsia; Regulamentu Konstrusaun, Fornesimentu Enerjia; Sistema Administrasaun Rai no Propriedade; Prosesu Judisiál; no Importasaun no Esportasaun.

143 Governu sei promove estabelesimentu ba **rejistu jerál husi garantia réal kona-ba bein móvel sira**, no mos rejistu husi ativu sira hodi kredór sira bele verifica kapasidade husi mutuáriu atu hetan garantia réal, iha perspectiva fomentu no diversifikasaun ekonómika no facilita asesu ba finansiamentu. Hodi nune'e, Governu sei implementa reforma ba garantia réal bein móvel sira no sei harii iha país **sistema recuperasaun empreza no insolvénsia**.



144 Governu sei halo estudu tékniku no iniciativa ba promosaun no dezvoltimentu husi setór finanseiru, ho koñesimentu kona-ba potencialidade Timor-Leste nian ba dezvoltimentu setór finanseiru ida ne'ebé kompetitivu iha nivel internasionál.

145 Governu sei implementa **Estratéjia Nasionál ba Empregu** 2017 – 2030 (ENE), ne'ebé fó enkuadramentu ba relasaun entre parte hotu-hotu ho interese atu aumenta empregu no dezenvolve kualifikasaun no treinamentu husi timoroan sira, no atu kria ajénsia koordenasaun no artikulasaun formál permanente entre Sistema Formasaun Akadémika no Formasaun Profisionál no atualizasaun husi **Planu Nasionál Formasaun Tékniku-Profisionál**.

146 Governu sei halo regulamentasaun ba **Lei Traballu** no halo implementasaun ba mekanizmu diálogu foun, ho ligasaun ba melloria ba produtividade traballu nian, atu nune'e hadi'a kompetisaun internasionál Timor-Leste nian.

147 Governu sei hola medida sira husi kombate ba empregu la metin no promosaun ba formasaun ekonomia no aplikasaun di'ak liu tan husi Lei Traballu, aleinde hametin sistema informasaun merkadu traballu nian, ne'ebé fó informasaun ne'ebé bele ajuda ligasaun entre oferta no prokura husi maun-de-obra.

148 Tanba hatene katak, komérsiu no investimentu hanesan "sorin rua husi moeda hanesan" no tanba importante tebes katak Timor-Leste kontinua hametin nia **sistema promosaun investimentu hamutuk ho asesu ba merkadu**, Governu, sei haktuir prosesu adezaun husi país ba Organizasaun Mundiál Komérsiu nian (OMC) no ba Asosiasaun Nasoens Sudeste Aziátiku nian (ASEAN), ne'ebé fó dalan ba asesu ba merkadu esportasaun no harii ligasaun komersiál no investimentu ho parseiru komersiál globál no rejionál sira.

149 Governu sei dezenvolve **Política Komersiál**, industriál, ho ligasaun ba **Política Industriál**, atu hametin kapasidade produtiva país nian hodi hatán ba nesesidade sira husi merkadu internu no aumenta esportasaun. Governu sei fó insentivu ba Diáspora Timor oan iha mundu tomak atu halo investimentu iha sira nia rai orijen, no lori kapitál, know-how no teknolojia atu nune'e kontribui

ba diversifikasaun ekonómika país nian no mós hetan benefísiu husi oportunidade negósiu ne'ebé ekonomia sei harii. Iha kuadru **kooperasaun trilateral**, entre Timor-Leste, Indonézia no Austrália (Terróriu Norte nian), Governu sei fó insentivu ba desenvolvimentu husi valénsia ekonómika komplementár, ne'ebé bele kontribui atu intensifika tan troka komersiál ne'ebé fó benefísiu ba nasaun viziñu tolu ne'e.

150 Kona-ba CPLP, Governu sei apoia **Emprezáriu Timor-Oan** kona-ba desenvolvimentu husi koperasaun, kolaborasaun no parseria, liuliu ho Uniaun Esportadór sira no ho Konfederasaun Empreziál CPLP nian, ne'ebé moris depoizde sorumutuk dahuluk husi Xefe Estado sira, iha 2014, iha Díli, no sei apoia mós desenvolvimentu ba relasaun ho Uniaun Banku, Seguradora no Instituisaun Finanseira CPLP nian (UBSIF-CPLP), ne'ebé foin hahú, no ida ne'e representa hakat desizivu ba kooperasaun finanseira entre nasaun sira husi Komunidade.

151 Governu sei kontinua fó prioridade ba adezaun ba Organizasaun Mundiál Komérsiu nian (OMC), no Organizasaun Mundial Propriedade Inteletuál, ne'ebé fó kontribuisaun atu aumenta melloria ne'ebé la'o daudaun iha infraestruturá país nian, iha kapitál umanu no kapasidade administrativu, atu nune'e aselera kreximentu no diversifikasaun ekonomia.

152 Governu sei hametin pozisaun institusionál husi **TradeInvest** Timor-Leste, nu'udar balkaun úniku atu atrai investimentu privadu, nasional no estranjeiru foun no atu halo promosaun ba esportasaun. Liu hosi TradeInvest no nia rede diplomátika iha mundu, governu sei halo esforsu hodi halo atrai **Investimentu Diretu Estranjeiru** (IDE) nu'udar estratéjia atu aumenta prokura agregada, hodi nune'e harii oportunidade empregu, promove kreximentu ekonómiku, hala'o transferénsia koñesimentu, teknolojia no abilidade sira husi empreza estranjeira ba empreza nasional no ba traballadór sira hodi hadi'a produtividade no kompetitividade ekonomia nian.

153 Nune'e, Governu sei implementa planu asaun husi **Kuadru Reforma ba Investimentu**, ne'ebé fó konjuntu husi prioridade polítika sira kona-ba aumentu efetivu husi investimentu privadu; harii mekanismu kona-ba hatama no haree ba

keixa no reklamasaun husi investidór sira ba Administrasaun Públika iha jerál; dezenvolve estratéjia ba promosaun investimentu atu apoia dezenvolvimentu iha setór prioritáriu ekonomia nian (ezemplu Kafé, Turizmu); no hametin ligasaun entre instituisaun públika sira ne'ebé responsável ba promosaun investimentu, dezenvolvimentu setoriál, ordenamentu territóriu no infraestrutúra ekonómika sira.

154 Nu'udar medida apoiu ba setór privadu, Governu sei hametin koordenasaun husi servisu governu nian atu nune'e promove aliñamentu husi prioridade sira ho objetivu komun governasaun nian; sei dezenvolve prátika planeamentu setoriál iha instituisaun sira husi área ekonómika; no sei define prosedimentu armonizadu sira kona-ba preparasaun ba dokumentu legál, ekonómiku no dokumentu estratéjiku sira seluk Governu nian.

155 Governu sei halo promosaun ba Ekonomia Sosiál Merkadu nian nu'udar orientasaun husi polítika ekonómika komplementár ba reforsu ba bein-estár no justisa sosiál. Tuir nune'e, **Movimentu Kooperativu, Asosiativu no Mutualista** sei hetan insentivu hodi bele garante partisipasaun komunitária no hetan benefísiu hosi dinámika hosi setór ne'ebé hanaran Setór Datoluk iha luta hasoru dezigualdade sosiál no ekonómika. Nune'e, sei fó insentivu ba resposta organizada husi sociedade sivíl ba nesesidade sosiál sira, liuhosi konsesaun beins no prestasaun servisu no utilizasaun sosiál husi exedente ne'ebé hetan.

#### **IV MODERNIZASAUN INSTITUSIONÁL**

156 Timor-Leste sei iha Governu ida ne'ebé forte, ho lideransa ne'ebé diálogo permanente ho **Parlamentu Nasionál**, ho lian ida ne'ebé forte besik instituisaun internasionál sira ba defeza ba definisaun ba ninia fronteira no afirmasaun husi nia soberania no lian ne'ebé ativu liután iha forum internasionál sira.

157 Ita sei adota norma sira husi **transparénsia públika** no Orsamentu Jerál Estadu ne'ebé partisipativu, ho objetivu ba promosaun kualidade moris. Hamutuk ho ida ne'e ita sei dezenvolve projetu "**Husu ba Governu**" atu fasilita

kontatu entre Governu – Administrasaun Públika - no sidadaun sira no promove klarifikasaun iha prazu razoável.

158 Ita sei halo **Akordu Estratéjiku Konsertasaun** ho partidu sira ne'ebé tur iha parlamentu, ba prazu médiu, ne'ebé artikula polítika ekonómika, fiskál, rendimentu, empregu no protesaun sosiál.

159 Partikularidade sira istórika no institusionál husi Timor-Leste, opsaun konstitusionál no lejizlativa, no mós orientasaun estratéjika, polítika no programática, hatudu definisaun abranjente husi konseitu **seguransa nasional**, no mós ba aumenta integrasaun, koordenasaun no kolaborasaun entre setór defeza, seguransa, no polítika esterna. Konstituisaun husi Repúblika Demokrátika Timor-Leste, hateten katak objetivu fundamentál Estadu mak defeza no garantia husi soberania husi nasaun (artigu 6). Planu Estratéjiku Dezenvolvimentu (PED) 2011-2030, define katak objetivu dezenvolvimentu Timor-Leste mak hametin seguransa no estabilidade, no mós harii instituisaun sira husi estadu direitu demokrátiku, no rekoñese konstrusaun ba dame nu'udar prioridade hodi bele hetan objetivu sira seluk kona-ba dezenvolvimentu no promosaun bein-estár sidadaun Timor-oan sira nian.

160 Orientasaun estratéjika hirak ne'e, refleto kestaun konjunturál ne'ebé iha relasaun ho evolusaun husi dezafiu no ameasa husi kontemporaneidade, no tuir evolusaun husi misaun sira husi forsa defeza no seguransa, inklui mós kontribuisaun ba seguransa interna no apoiu ba polítika esterna Estadu nian, ne'ebé tama mós iha atuál paradigma seguransa kooperativa. Paradigma seguransa kooperativa, refleto tendénsia husi tinan ruanulu ba kotuk to'o agora, atu aumenta kooperasaun entre Estadu sira iha matéria seguransa, iha nível bilaterál no multilaterál. Definisaun seguransa kooperativa, la hanesan seguransa koletivu ka defeza koletivu (ne'ebé inklui nia), no iha ligasaun ho interdependénsia ekonómika, husi kuadru normativu komún no reforsu konfiansa entre Estadu sira. Tuir ida-ne'e Governu VII propoin atu kria Konsellu Seguransa Nasionál, ne'ebé tama iha kontestu polítiku-legál, no liuliu iha **Konseitu Estratéjiku Defeza no Seguransa Nasionál**, ne'ebé define orientasaun estratéjika sira no liña orientadora Estadu nian iha matéria kona-ba

seguransa nasional, nune'e mós iha Lei Seguransa Nasionál, ne'ebé dixiplina ezersisiu koordinadu husi aktividade Estadu nian iha defeza ba nia elementu esensial sira, liu husi definisaun ba polítika Seguransa Nasionál; garante dezvoltimentu integradu husi atividade sira iha matéria defeza no seguransa, nune'e mós iha kadru sistema seguransa kolektivu. Konsellu Seguransa Nasionál sei órgaun konsultivu Governu nian, ne'ebé haree ba akonsellamentu no apoiu ba desizaun husi Primeiru-Ministru no Governu, maibé mós ho objetivu ba akonsellamentu no apoiu ba elaborasaun husi polítika seguransa nasional, inklui polítika defeza, polítika seguransa no polítika esterna; iha âmbito husi sira nia kompeténsia iha matéria hirak ne'e.

**161 Konsellu Seguransa Nasionál** sei sai mós nu'udar responsável ba artikulasaun no koordinasaun husi área hirak ne'e oin-oin no ho ligasaun ba malu, hodi kontribui atu harii vizaun klara no koerente ba polítika Estadu, nune'e mós ba estabilidade, efisiénsia no efikásia husi funsionamentu integradu husi aspetu oi-oin hirak ne'e.

162 Iha nível internu, polítika **Seguransa** sira iha papél fundamentál ba dezvoltimentu País nian no kontribui ba sentimentu seguransa no atu hadi'ak liután kualidade moris no bein-estár husi populasaun.

163 Iha termu jerál, atu harii **Sistema Seguransa Interna no Protesaun Sivil** ne'ebé efektivu, lais, no besik, ne'ebé hetan konfiansa husi sidadaun sira, kontinua presiza medida boot liu husi investimentu iha rekursu umanu, iha konsolidasaun no dezvoltimentu husi instituisaun sira, iha melloria ba kadru legál, iha aumentu ba rekursu lojístiku, iha konstrusaun ba infraestrutura no iha promosaun ba jestaun ne'ebé eficiente liu.

164 Liu tiiha tinan 15 husi Independénsia, setór Seguransa Interna no Protesaun Sivil iha knaar importante tebes iha konsolidasaun ba dame no estabilidade no iha promosaun husi Estadu Direitu iha dalan ba ita nia demokrasia foun. Maibé, presiza kontinua halo dezvoltimentu ba setór rua hirak ne'e atu nune'e bele kumpre sira nia funsaun xave, ho efisiénsia no profesionalizmu, hodi hatán ba espetativa sidadaun sira nian.

165 Hodi nune'e, presiza halo reforsu no konsolidasaun ba funsionamentu husi instituisaun Seguransa Interna no Protesaun Sivíl, halo mudansa, avaliasaun no hadi'a problema, la'os de'it iha vertente operasionál, maibé mós iha vertente lejislativa, iha vertente husi efisiénsia ekonómika no previzaun husi mekanizmu sira ne'ebé bele hala'o dinamizasaun husi sistema sira ne'ebé uza rezolusaun husi disputa ho difikuldade ne'ebé aumenta, ne'ebé loron loron sai dezafiu.

166 Formasaun ba profisionál sira husi Instituisaun Seguransa Interna no Protesaun Sivíl kontinua sai nu'udar tema importante no, tanba ne'e, tenke perspetiva iha liña dahuluk.

167 Dezenvolvimentu no konsolidasaun ba Sentru Formasaun oin-oin, importante tebes, no tenke hetan kuadru, lider, formadór no dosente sira foun, atu hakbesik kultura **Seguransa no Protesaun no Sokoru**, no hadi'a nia funsionamentu no uniformizasaun husi regra formasaun, ho objetivu atu reforsa formasaun espesializada, ne'ebé konsidera mós hanesan pilar importante ba kapasitasaun ba Instituisaun sira husi setór Seguransa Interna no Protesaun Sivíl no ba konsolidasaun husi sistema sira-ne'e.

168 Kuadru legál husi setór Seguransa Interna no Protesaun Sivíl tenke hadi'a nafatin no tenke iha kuadru legál ne'ebé adekuaudu no reflète realidade atuál no haree ba perspetiva jéneru. Aleinde ne'e, importante katak uza lian simples ida atu normativu sira no garantia husi sistema uniforme no armoniozu hanesan dezafiu importante ne'ebé iha iha setór sira ne'e no ida ne'e favorese koñesimentu ba lei husi profisionál sira no husi sidadaun sira.

169 Nune'e mós, manutensaun ba relasaun di'ak husi kooperasaun no koordinasaun importante tebes ba estratéjia konsolidasaun no dezenvolvimentu husi Instituisaun Seguransa Interna no Protesaun Sivíl, ne'ebé tenke fó importánsia ba asaun apoiu ba kapasitasaun, formasaun no monitorizasaun téknika profisionál sira husi setór hirak ne'e no atu hasa'e ninia kapasidade institusionál.

170 Governu fó prioridade ba asaun ba kontinuidade husi adosaun ba polítika no medida espesífika sira ne'ebé kontribui atu Timor-Leste sai País ida ne'ebé seguru liu ho objetivu atu reforsa autoridade Estado nian no dezenvolvimentu no

konsolidasaun ba efikásia husi Forsa no Servisu Seguransa no ajente Protesaun Sivíl.

171 Nun'e, ida ne'e la'ós programa foun, maibe fo continuidade, ho vizaun atualizada no inovadora, ba polítika sira ne'ebé define iha Planu Estratéjiku Dezenvolvimentu 2011-2030 ne'ebé hahú implementa ona hosi Programa Governu Konstitusionál V. Nune'e, programa ida ne'e dezeña iha kontestu continuidade, no iha tempu hanesan fó oportunidade atu halo reavaliasaun no ajusta projetu sira ne'ebé hala'o hela.

172 Iha mandatu ne'e, no iha área Seguransa, governu sei kontinua implementasaun ba Planu Estratéjiku Seguransa Interna - 2030 nu'udar dalan atu garante dezempeñu di'ak tebes iha área dame, seguransa no prosperidade ba ita nia Povu. Nune'e, sei - kontinua implementasaun ba Faze Daruak (2016-2020) husi Planu ne'e ne'ebé foka liu ba Aumenta no Dezenvolve Seguransa Interna.

173 Nune'e, no iha tinan lima oin mai, ita halo nafatin esforsu hodi hadi'a kapasidade operasionál efetiva iha prevensaun no investigasaun ba krime, iha konsolidasaun husi seguransa públika no kontrolu fronteira. Kontinua mós atu hametin modelu polisia komunitáriu no mantein estabilidade no seguransa públika nu'udar responsabilidade prinsipál husi Polísia Nasionál Timor-Leste nian.

174 Governu sei kontinua aposta iha kualifikasaun husi rekursu umanu sira no iha profesionalizasaun husi Instituisaun Seguransa sira, no fó orientasaun ba rekrutamentu no formasaun hodi hatán ba nesesidade atuál no iha tempu oin mai.

175 Konkretizasaun simultânea ba objetivu sira husi rasionalizasaun orgánika no utilizasaun di'ak liután husi rekursu umanu sira, liuliu iha perspetiva igualdade jéneru, rekursu materiál no rekursu finanseiru sei sai mós meta boot seluk ne'ebé atu alkansa, iha prosesu dezenvolvimentu, konsolidasaun, modernizasaun no otimização ba funionamentu Ministériu Defeza no Seguransa.

176 Durante legislatura ida ne'e sei implementa programa modernizasaun no rentabilizasaun ba infraestrutura no ekipamentu sira ne'ebé nesesáriu hodi hala'o ba responsabilidade sira n'ebe fó ba servisu sentráal husi Ministériu Defeza no Seguransa.

177 Ita sei halo modernizasaun ba ita nia **Forsas Armadas** no valoriza ezersísiu husi funsaun sira iha área Defeza Nasionál, fo dignidade ba **veteranu kombatente** sira no fó apoiu **ba família militar sira nia**.

178 Sei harii mós Entidade Formadora komún responsável ba formasaun ba Ofisiál sira husi **F-FDTL** no **PNTL** atu nune'e halo rentabilizasaun ba formasaun husi rekursu umanu sira iha área Defeza no Seguransa no hadi'a implementasaun husi Sistema Integradu Seguransa Nasionál ne'ebé prevee iha **Lei Seguransa Nasionál**.

179 Governu hahotu mós ninia programa ba enkuadramentu legál no apoiu ba desenvolvimentu Autoridade Nasionál Protesaun Sivíl, liuliu Bombeirus iha perspectiva atu haluan boot ba munisípiu sira hotu.

180 Nu'udar sumáriu, kontinuasaun ba desenvolvimentu no konsolidasaun hosi Instituisaun Seguransa sira, iha domíniu ne'e, preokupasaun xave sira sae orientasaun báziku ba Governu nia servisu iha lójika ba konjuntu ne'ebé tau iha konsiderasaun preokupasaun kona-ba komplementariedade no ne'ebé permite hetan rezultadu ne'ebé di'ak liu, liu husi dalan ne'ebé efisiente, liu hosi simplifikasaun, klarifikasaun no utilizasaun koordinada husi meius no prosesu sira ne'ebé modernu no ajustadu.

181 Kona-ba **relasaun esterna no política internacional** Timor-Leste tuir continuidade no koerénsia bazeia ba prinsípiu konstitusionál sira. Nune'e tuir politika proativa iha promosaun no defeza ba interese nasionál sira bazeia ba eixu asaun rua: dinamizasaun boot liu ba politika esterna no desenvolvimentu institusionál husi Ministériu.

182 Nune'e Governo Konstitusionál VII kontinua fó prioridade ba reforsu husi relasaun amizade no kooperasaun ho país viziñu sira no ho país sira ne'ebé ita



iha relasaun istória, kultura no valór sira husi solidariedade no fraternidade, liuliu **Komunidade Rai ne'ebé Ko'alia Lia-Portugés - CPLP**.

183 Iha kuadru rejionál no multilaterál, Governo Konstitusionál VII iha partisipasaun ativa iha debate no buka solusaun ba dezafiu sira husi sosiedade, nasaun no mundu, liuliu, kestaun ambientál, pirataria, imigrasaun ilegál, tráfikú umanu, esplorasau no eskravatura seksual, narkotráfiku, brankeamentu kapitál, terorizmu no krime hasoru umanidade.

184 Sae hanesan objetivu estratéjiku husi Governu ne'e atu desenvolve pilar tolu ne'ebé ezije ba adezaun plena ba **ASEAN** no konsolidasaun husi relasaun vantajen ba malu ho país sira husi rejiaun tuir objetivu atu afirma pozisaun husi Timor-Leste nu'udar Estadu Membreu ke-11.

185 Mantein nafatin empeñu ba relasaun kooperasaun ho estadu frájil sira liu husi **g7+**, no mós kontinuasaun husi intervensaun ativa nu'udar observadór permanente iha **Fórum Illa Pasifiku**.

186 Governu Konstitusionál VII kontinua hala'o esforsu ba relasaun kooperasaun ho Austrália, Indonézia, Portugal, Estados Unidos América, país BRICS (Brazíl, Rúsia, Índia, Xina no África Súl), Japaun, Korea Súl no país sira husi rejiaun Golfu.

187 Bazeia ba diálogu polítiku ne'ebé harii no prinsipiú diretór sira husi Akordu Cotonou, Governu Konstitusionál VII rekoñese progresu sira ne'ebé hala'o ho parseria ho **Uniaun Europeia**, iha projetu kooperasaun ba desenvolvimentu no apoiu ba governasaun di'ak no tuir mai, foku ba kontinuasaun husi projetu sira ne'e no halo ampliasaun ba área kooperasaun foun tuir prinsipiú promosaun ba demokrasia no liberdade fundamentál, dame no seguransa no desenvolvimentu sustentavel.

188 Governu Konstitusionál VII sei aposta ba reforsu husi pozisaun husi Timor-Leste iha **Organizasaun Nasoins Unidas** (ONU), liuliu iha partisipasaun husi unidade espeziál polisia no militar sira iha Operasaun Dame. Mantein pozisaun husi Timor-Leste iha partisipasaun ativa iha ONU, no, bainhira oportunu, participa iha debate kona-ba nesesidade reforma, espansaun no

demokratizasaun husi Konsellu Seguransa hodi tuir objetivu sira husi Karta Nasoins Unidas iha área prevensaun no rezolusaun pasifika ba konfliktu no apoiu iha ekilibriu husi forsa.

189 Kona-ba eixu atuasaun ba desenvolvimentu institusionál husi Ministériu Negósius Estranjeirus no Kooperasaun, Governu Konstitusionál VII asume orientasaun husi prátika di'ak husi jestaun interna transparente no responsável, ho apoiu husi regra sira husi auditoria interna kontinua. Objetivu espesifiku ba mandatu ida ne'e hanesan planu formasaun kontinua ba funsionáriu sira no regulamentasaun ba Karreira Diplomátika.

190 Timor-Leste hanesan país kosteiru iha Sudeste Aziátiku, entre viziñu rua ne'ebé ho dimensaun bo'ot. Iha norte, oeste no leste, ita hetan arkipélagu indonesia. Iha sul, ita hetan kontinente boot austrália nian, maizumenus milla náutika 300 liu hosi tasi Timor. Maski nune'e, to'o agora, la iha **fronteira** tasi nian ne'ebé permanente entre Timor-Leste no viziñu rua hirak ne'e.

**191 Delimitasaun ba fronteira permanente** ho Austrália no Indonézia, nu'udar prioridade nasional tanba Timor-Leste, hahú hosi ninian independênsia, iha aspirasaun atu ezerse poder plenu soberania kona-ba territóriu nasional tomak, inklui territóriu marítimu ne'ebé, tuir direitu internasionál, daudaun iha ninia jurisdisaun nia laran.

192 Ida ne'e signifika katak aleinde fó prioridade ba negosiasaun hodi hahotu delimitasaun ba fronteira terrestre no maritima sira ho Indonézia no fronteira maritima ho Austrália, sei presiza hala'o implementasaun ba programa no medida sira ne'ebé estratéjiku ba defeza no prezervasaun territoriál, no aposta ba projetu hadi'a kondisaun supervizaun husi espasu terrestre, marítimu no aéreu, iha âmbito husi planu nasional ba defeza husi soberania.

193 Nune'e, estabelesimentu husi fronteira permanente sei permite katak Timor-Leste define iha mapa ninia fronteira terrestre no maritima, ne'ebé iha rekoñesimentu internasionál, hodi permite seguransa boot liu no fiar ba desenvolvimentu husi indústria no servisu balu, inklui área seguransa, imigrasaun, peska, turizmu no alfândega. Bele mós dudu desenvolvimentu emperezariál no investimentu, inklui setór mina-rai nian, tanba kreximentu no

diversifikasaun ekonómika reprezenta konstruasaun husi futuru prósperu, seguru no sustentavel ba Timor-Leste.

194 Governu Konstitusionál VII hakarak **Governasaun** ida ne'ebé forte iha ninia knaar koordenasaun no defeza interese públiku nian, ne'ebé inteligente no moderna iha defeza atu hadi'a kualidade prestasaun servisu, ho prosedimentu sira ne'ebé simplifikadu ho inovasaun no dijitalizasaun, hodi garante koordenasaun no regulasaun efikás no halais prosesu lejislativu.

195 Governu sei estimula **konfiansa husi sidadaun sira ba Governu**, hodi promove koezaun sosiál, imajen Governu nian no relasionamentu ne'ebé di'ak entre órgaun soberania sira, liu husi medida sira ne'ebé promove:

— 196 Melloria ba kualidade husi demokrasia, no tuir mekanizmu ne'ebé aumenta no estimula **partisipasaun demokrátika**:

- Iha manutensaun ba relasaun entre órgaun soberania sira, hanesan komunikasaun kontínua ho Parlamentu Nasionál no fó segmentu ba preokupasaun sira, sidadaun sira nian, ne'ebé hato'o liu husi Deputadu sira;
- Garante transparénsia, responsabilidade, eskrutíniu demokrátiku no kontrolu legalidade nian;
- Atu fahe informasaun no halo ampliasaun ba kanál komunikasaun ho sidadaun sira.

— 197 **Governasaun ida ne'ebé konsentra iha misaun no iha rezultadu sira**:

- Polítika, orientada ba rezultadu sira implika adaptasaun husi estrutura orgánika Governu nian ba polítika transversál sira husi departamentu ministeriál oin-oin sira;
- Apoiu ba Primeiru-Ministru no resposta konkreta ba dezafiu ne'ebé Ezekutivu hetan, ne'ebé eziye Xefe Governu nian desizaun.

198 Ezekutivu ne'e sei mantein sira-nia responsabilidade kona-ba kriasaun ba **ordenamentu jurídku no normativu Timor-Leste**, nu'udar baze husi Estadu Direitu Demokrátiku. Nune'e ho konsiderasaun ba rekomendasaun husi Komisaun Reforma Lejislativa no Setór Justisa, ita sei promove reforsu husi intervensaun husi Prezidénsia Konsellu Ministrus nian, ne'ebé entidade sentrál governu nian ho atribuisaun sira kona-ba koordenasau ba atividade lejislativa, hodi promove reforma ne'ebé bazeia ba medida fundamentál hirak tuir mai: **a)** adosaun ba polítika lejislativa ne'ebé haree ba qualidade husi lei sira, tuir objetivu husi simplifikasaun, asesibilidade no ezekusaun di'ak liután husi lei sira; **b)** insersaun husi kultura lejistika iha panorama lejislativu, ne'ebé hetan apoiu iha respeito ba prinsípiu fundamental sira husi direitu, iha dezvoltamentu ba metodolojia ba preparasaun ba lei sira, ne'ebé esensiál hodi lei sira bele atinje objetivu sira no mós kumprementu husi regra sira husi lejistika formál, ne'ebé fó dalan ba klareza no determinabilidade husi lei no atu aumenta nivel koerénsia husi ordenamentu jurídku no seguransa jurídika; **c)** reforma husi prosedimentu lejislativu governamentál, liu husi adosaun ba regra legál no prosedimentál sira ne'ebé uniforme no klaru, husi definisaun husi entidade sira ne'ebé intervêm iha faze ida-idak husi prosesu elaborasaun husi lei sira no organizasaun hosi ninia meius, no sentraliza koordenasau lejislativa no reforsa apresiasaun ba projetu lejislativu; **d)** adosaun husi medida ba simplifikasaun, revizaun no konsolidasaun husi lei sira ne'ebé vigora; **e)** promosaun kontínua husi konstrusaun husi sistema jurídku, hodi harii ambiente saudável no pozitivu husi Estadu Direitu, liu husi medida ne'ebé promove kuadru legál esensiál no adosaun ba regulamentasaun komplementár ba lei sira ne'ebé vigora no **f)** reforsu husi asesibilidade ba koñesimentu husi lei sira, ne'ebé hanesan rekizitu fundamentál husi Estadu Direitu, liu husi organizasaun husi publikasaun ofisiál lei sira nian, ne'ebé tenke eletrónika no gratis, no implementasaun husi sistema bilinge, no garante tradusaun husi lei hotu-hotu ba lian tetun, hodi promove transparénsia husi sentidu lei no universalidade husi asesu.

199 Sei harii mekanizmu ba planeamentu ba atividade lejislativa ne'ebé haree ba definisaun husi prioridade no fiskalizaun ba atividade lejislativa. Importante katak iha investimentu maka'as no estruturadu iha formasaun no

especializasaun husi kadru tékniku jurista sira, ho apoiu husi asesoria internasionál sira, hodi promove aumentu ba asesór jurídiku nasional sira ne'ebé iha kapasidade no preparasaun.

200 Kona-ba elaborasaun ba lejislasaun, Prezidénsia Konsellu Ministrus sei iha responsabilidade espesífika iha promosaun ba modelu no regra simplisidade atu fasilita redasaun ba lei sira, nia lian no tradusaun, atu bele garante utilizaun husi lian rua ofisiál iha paralelu ne'ebé transforma sistema jurídiku **iha sistema bilinge no asesível liu** ba profesionál sira no ba populaun tomak.

201 Governu sei kontinua fomenta **reforma lejislativa no husi setór justisa**, tuir proposta sira husi Komisaun Reforma Lejislativa no Setór Justisa, liu husi metodolojia ne'ebé lori ba modernizasaun, simplifikasaun, armonizasaun, adekuasaun no efikásia husi lei no ba desenvolvimentu husi kadru normativu nasional, liu liu haree ba adekuasaun no desenvolvimentu husi lei penal substantiva, hodi nune'e tuir di'ak liu tan nesesidade no espetativa nasional sira no mós kompromisu internasionál no rejional sira ne'ebé Estadu asume.

202 Nune'e mós, Governu ida ne'e propoin atu garante monitorizasaun ba programa lejislativu husi iniciativa husi setor atividade Governu ba períodu mandatu lejislativa no garante ninia ezekeusaun, liuliu husi monitorizasaun husi nia tinan tinan Garante mós kriaun no funksionamentu husi forum Diálogo kona-ba Direitu no Justisa, ne'ebé promove reuniaun regular sira, bazeia ba tema sira husi reforma lejislativa no setór justisa, atu hetan debate nasional ne'ebé ho informasaun, motivasaun, partisipasaun, tuir tuir malu, konsekuente no efetivu.

203 Harii **komunikasaun ida ne'ebé efisiente no efikás iha Governu nia laran**, ho kanál komunikasaun ne'ebé estrukturadu iha ministériu nia laran, no entre ministériu sira, atu hatene di'ak liu tan servisu ne'ebé desenvolve hosi Governu, hodi bele iha mensajen ida deit ba liur.

204 Hafoin restrukturasan husi **Gráfika Nasional ba INTL-Imprensa Nasional Timor-Leste I.P.**, tenke halo formalizasaun ba ninia estruktura orgánika no téknika no promosaun ba formasaun husi kadru tékniku sira no dinamizasaun husi servisu no produktu sira ne'ebé iha.

205 Tanba harii ona estrutura bázika no enkuadramentu legál apoiu ba komunikasaun sosiál, hanesan: **Konsellu Imprensa; Sentru Rádiu Komunidade no Ajénsia Noticias Timor-Leste nian - TATOLI**, agora tenke hahú faze foun husi promosaun no apoiu ba iniciativa kriaun no diversifikasaun husi órgaun komunikasaun sosiál, liuliu iha apoiu ba Asosiasaun jornalista Nasionál sira, hadi'a infraestrutura fíziku **RTTL, E.P.** no harii Institutu Formasaun ba Jornalista Sira.

206 Konsidera nu'udar rekizitu fundamentál husi Estadu Direitu katak iha sistema justisa ne'ebé besik sidadaun sira, ho kritériu profesionalizmu aas no izensaun ne'ebé bele hatán ba aspirasaun husi sidadaun sira no atór sosiál sira seluk. Nune'e, no ho konsiderasaun ba proposta husi Komisaun Reforma Legislativa no Setór Justisa, governu sei promove reforma estruturál husi administrasaun justisa nian konsidera ba vetor prinsipál hirak tuir mai: **a)** reforsu ba formasaun no kapasitasaun ba ajente no profesionál sira husi setór justisa, liu husi adosaun husi modelu formasaun ne'ebé adekua no implementasaun ba reforma husi Sentru Formasaun Jurídika no Judisiária, no fó kondisaun organizasionál, finanseira no ema ne'ebé presiza ba ninia funksionamentu nu'udar eskola direitu nian; **b)** reforma no organizasaun judisiária, liu husi alargamentu husi mapa judisiáriu no estabelesimentu husi tribunál ne'ebé prevee iha konstituisaun; **c)** estabelese apoiu tékniku-jurídiku ba tribunál sira no atór judisiáriu sira seluk; **d)** reforsu ba investigasaun krimínál; **e)** promove mekanizmu asesu ba justisa no ba direitu, no garante katak sidadaun hotu-hotu iha asesu ba justisa ho kualidade, kuitativu no justu, la haree ba sira-nia estatutu sósiu-kulturál ka ekonómiku no **f)** promosaun ba meiu alternativu ba rezolusaun konflitu, hanesan arbitrajen, mediasaun no konsiliaun, iha área ne'ebé iha nivel konflitu boot, no habesik justisa ba meiu informál.

207 Servisu justisa tenke hetan melloria liu husi programa abranjente ne'ebé promove nia aprosimasaun ba sidadaun sira, transparénsia husi sira nia prosedimentu legál no administrativu, melloria husi ninia funksionamentu, atu nune'e serve di'ak liután sidadaun no empreza sira. Programa reforma ida ne'e sei inklui servisu sentrál no munispál sira no tuir simplifikasaun administrativa, hasa'e efisiénsia no hadi'a prosedimentu sira, promove servisu sira ne'ebé besik

liu sidadaun sira, reforsu ba formasaun atu hasa'e qualidade no kompeténsia husi sira nia traballadór no kontinua hala'o desmaterializasaun ba servisu públiku. Área sira hanesan rejistu no notariadu, servisu prizionál no rai no propriedade sei sai hanesan prioridade.

208 Governu sei promove aumentu husi kooperasaun ho país CPLP no ASEAN no ho organizasaun internasionál sira seluk ne'ebé mak parseiru importante husi área Justisa nian, liuliu iha área hanesan administrasaun justisa no reforsu ba instituisaun judisiária, rejistu no notariadu, servisu prizionál no reinsertaun sosiál, tradusaun jurídika, lejislasaun no direitus umanus, hodi kria ambiente favorável ba desenvolvimentu husi sistema legál operativu, adekuaudu no efisiente.

209 Governu sei fó kontinuidade ba implementasaun husi polítika pública sira ne'ebé hala'o ona iha área rai no propriedade, no hadi'a tan no komplementa solusaun sira ne'ebé implementa ona, no fó atensaun espiál ba implementasaun ba lei sira ne'ebé foin aprova kona-ba definisaun titularidade bein imóvel no rejime espropriaun tanba utilidade pública. Hodi nune'e, tenke implementa liuliu Komisaun Rai no Propriedade, no remata levantamentu kadastrál no inaugurasan rejistu ba bein imóvel sira.

210 Prioridade prinsipál mak: prevensaun no kontrolu husi kriminalidade grave, violenta no organizada, sistema protesaun ba vítima krime no ema sira iha situasaun risku, ida justisa restaurativa, sistema ezekusaun pena no medida kautelár no reinsertaun sosiál, prevensaun ba reinsertaun, efisiénsia husi protesaun sivíl, kondisaun husi prevensaun no fó sokorru no promosaun ba seguransa rodoviária no hamenus asidente sira.

211 Jestaun ba sistema justisa iha falla efisiénsia no falta koordenasaun iha forma hodi kompeténsia no servisu fó ba ema sira ne'e presiza. Importante nune'e atu halo **modernizasaun ba ferramenta husi tramitasaun husi prosesu sira iha tribunál**, servisu atu hamenus hahalok prosesuál ne'ebé la presiza, la iha utilidade ka la aumenta valór no tenke hanoin fila fali ba kna'ar

husi ajente oioin. Ita sei **hakbesik justisa ba sidadaun sira no hadi'a kualidade servisu públiku justisa nian.**

212 Timor-Leste iha progresu barak kona-ba dezvoltamentu sustentavel iha tinan sanulu resin-lima ne'ebé liu tiha ona husi restaurasaun independénsia iha 2002. País atinje nivel di'ak husi estabilidade makroekonomia no taxa kreximentu PIB real naun-petrolíferu ne'ebé forte, besik 5% kada tinan. Taxa kreximentu forte ne'e hetan impulsu husi aumentu husi despeza pública, hamutuk ho estratéjia governamentál temporária husi antesipasaun ba despeza, no uza empréstimu no foti fundus aas husi Fundu Petrolíferu.

213 Ita sei atu halo levantamentu kompletu, iha ministériu hotu-hotu, husi fonte jersaun gastus ne'ebé la justifikasaun, nune'e mós identifikaun husi medida sira ba rasionalizasaun no kualifikasaun husi despeza. Importante atu organiza fila fali funsaun regulaun no supervizaun, hametin independénsia husi reguladór no supervisor sira ba setór ne'ebé regula no prevene abuzu iha setór finanseiru.

214 Dezafiu fiskál ba Timor-Leste relasiona ho tranzisaun ba ekonomia ida ne'ebé sustentavel no ho pasajen ba kreximentu ida ne'ebé lidera husi setór privadu iha tinan 5 to'o 10 mai. Tanba reseita petrolífera atu tun, no la iha garantia katak atu deskobre rezerva foun ne'ebé significativa, liu Greater Sunrise, país presiza utiliza rikusoin husi mina-rai no gás nian atu dezenvolve ekonomia naun-petrolíferu no tuir dalan kreximentu inkluzivu, no iha tempu hanesan, hadi'a edukasaun no saúde no hamenus kiak no dezempregu joven, liuliu iha zona rurál sira.

215 Polítika **antesipasaun husi despeza sira** nafatin parte husi estratéjia ne'ebé hakarak harii baze sira ne'ebé nesesáriu ba dezvoltamentu sustentavel ba longu prazu lidera husi setór privadu, no reseita sira ne'ebé asociadu garante finansas governamentál sustentavel. Sustentabilidade fiskál sai hanesan aspetu esensial husi viabilidade ekonómika Timor-Leste nian, no tenke hetan monitorizasaun.



216 Timor-Leste haka'as an ba introdusaun husi sistema orsamentasaun ba dezempeñu, no mós **Kuadru Despeza Médiu Prazu**, atu nune'e halo integrasaun di'ak liu ba planeamentu no orsamentasaun. Ida ne'e inklui orsamentasaun ne'ebé bazeia ba programa sira la'ós ba meu produsaun. Hodi nune'e governu propoin:

- **Kontinua reforma institusionál ne'ebé fó dalan ba setór públiku ida ne'ebé transparente no eficiente, liuliu** prosesu Orsamentasaun husi Programa sira, no hametin mekanizmu hirak ne'ebé fó dalan ba governasaun ida ne'ebé transparente no responsável no sai obstákulu ba risku korrupsaun, no hametin sistema daudaun husi monitorizasaun no fiskalizasaun, no hadi'a transparénsia orsamentál;
- **Garante sustentabilidade husi finansa públika**, no estabeselese objetivu no alvu sira ne'ebé definidu ba Timor-Leste liu husi vizaun ida ne'ebé aliña ho forma ida ne'ebé klaru ba país, hodi garante alokasaun ida ne'ebé prudente husi rekursu sira ne'ebé la barak.

217 Konstituisaun determina katak **Administrasaun Públika** atu buka tuir interese públiku no mós atu hakbesik liután servisu ba populasaun. Iha tinan 15 husi nia istória, funsaun públika Timor-Leste aumenta dala tolu iha número, no iha kreximentu esponensial iha kompleksidade. Ohin lora iha karreira 20 no liu kategoria profisionál 100 iha funsaun públika, ne'ebé hatudu ona katak ladún armonia ho prestasaun servisu ne'ebé fó.

218 Governu liu hosi, **Komisaun Funksaun Públika**, sei hala'o estudu kle'an-liu ba produtividade no dimensaun husi forsa traballu funsaun públika nian atu nune'e determina nesidade réal sira kona-ba funsionáriu iha Administrasaun Públika no ninia kolokasaun bazeia ba kualifikasaun, kapasidade no esperiénsia profisionál, no mós implementasaun husi instrumentu sira ne'ebé fó estímulo ba produtividade, hanesan avaliasaun dezempeñu tuir rezultadu sira.

219 Funksionamentu di'ak husi administrasaun públika, ezije despolitizasaun husi funsaun públika no reforsu ba medida kombate familiarizmu. Governu sei hola pozisaun metin kona-ba aplikasaun ba prinsípiu méritu iha rekrutamentu

no promosaun pesoál nu'udar instrumentu atu alkansa imparcialidade husi setór públiku.

220 Prioridade husi Governu mós reforsu husi kapasidade sira husi funsaun públika atu nune'e fó servisu efetivu, efisiente no asesivel ba povu Timor-Leste, inklui hametin no dezenvolve nafatin sistema **governu eletróniku**. Importante katak iha dezenvolvimentu ba funsaun públika competente ne'ebé iha kapasidade no abilidade ne'ebé nesesáriu atu hala'o servisu di'ak ba sidadaun sira, oras ne'e no iha tempu oin mai. Funsauun públika tenke iha sistema ida ne'ebé garante ba funsionáriu públiku sira oportunidade atu hetan asesu ba formasaun no dezenvolvimentu, ho foka liu atu hadi'a dezempeñu no efetividade servisu no promosaun ba dezenvolvimentu profisionál kontínuu.

221 Promosaun husi kapasidade jestaun sai nu'udar dezafiu espesial ba Governu Konstitusionál VII ne'ebé sei konsentra esforsu atu hili no fó formasaun ba jestór di'ak, ho koñesimentu tékniku sólidu no abilidade lideransa.

222 Difikuldade sira kona-ba rekursus umanus sei hamenus liu husi ferramenta teknolojia informátika, liu liu iha atividade rekrutamentu no promosaun ba funsionáriu sira, avaliasaun dezempeñu no jestaun ba forsa traballu hodi nune'e halo promosaun ba imparcialidade no impesoalidade no hamenus sala.

223 Iha nivel Administrasaun Estadu nian, sentráal no lokál, Governu VII propoin atu hadi'a **polítika reforma administrativa** no dezenvolvimentu lokál iha nivel munisípiu, hosi pontu de vista lejislativu husi reforsu ba governasaun no kriaun ba **programa kapasitasaun ba kuadru administrativu sira husi munisípiu, suku no bairru sira** iha funsaun implementasaun ba jestaun públika munisipál ba médiu no longu prazu.

224 Hamutuk, Governu hakarak atu dezenvolve rejime jurídiku husi instrumentu sira husi jestaun territorial ne'ebé define regra prinsipál sira kona-ba planeamentu no ordenamentu territóriu, hanesan, programa nasional ba polítika ordenamentu territóriu, planu setorial sira, planu rejional ba

ordenamentu territóriu, planu intermunisipál ba ordenamentu territóriu, planu espeisial ba ordenamentu territóriu, planu diretór munisipál, planu urbanizasaun no seluk tan.

225 Nune'e, governu sei harii ba país tomak lejislasaun ne'ebé presiza iha área Ordenamentu Territóriu no Urbanizmu, no halo regulamentasaun ba Planu Nasionál Ordenamentu Territóriu no dezenvolve ierarkia tomak husi planeamentu territoriál, ne'ebé sei introdús Eskema Rejionál ba Ordenamentu Territóriu (EROT), Planu Diretór Munisipál (PDM), Planu Dezenvolvimentu Urbanu (PDU) no Planu Detalladu (PD), to'o nivel loteamentu, tuir Regulamentu Nasionál Ordenamentu Territóriu, ne'ebé atu prepara no aprova iha tempu badak bainhira posivel. Iha tempu hanesan, Governu sei fó atensaun liuliu ba fortalesimentu no atualizasaun teknolójika kontínua husi rede jeodézika nasional, atu nune'e garante koordinada topográfika sira ne'ebé ho sala menus; harii instituisaun iha administrasaun indireta estadu atu jere **Kadastru Predial Nasionál** no haree ba kestaun tékniku ne'ebé iha relasaun ho jestaun rai no propriedade iha Timor-Leste.

226 Ikus liu Governu hakarak halo adosaun ba **Estatutu polítiku-administrativu sidade Díli**, ne'ebé foun no transforma husi Munisípiu ba Sidade Metropolitana hanesan unidade administrativa territoriál ho aspetu supramunisipál iha ne'ebé tama Bairru sira uluk hanaran Suku.

227 Ba definisaun husi polítika nasional no liña estruturante sira ba konsolidasaun Estadu, Governu sei promove konferénsia nasional ho partisipasaun husi sosiedade tomak hodi garante katak foka liu ba interese sira hudi Povu no Estadu, ohin no iha futuro, ba Governu ne'ebé deit.

## V. KONKLUSAUN

228 Hanesan konkluziun, iha dokumentu ida ne'e ita la hakerek medida no servisu hotu husi Governu ida ne'e iha tinan lima oin mai. Atividade husi Governu sei iha flexibilidade hodi bele halo adaptasaun no hatama medida sira ne'ebé presiza hola tanba emerjénsia ka evolusaun normal husi atividade

ekonómika no sosiál iha país no iha mundu; atividade husi Governu sei iha flexibilidade natoon hodi halo adaptasaun no hatama medida sira ne'ebé propoin husi partidu seluk ne'ebé tuur iha Parlamentu Nasionál ne'ebé tuir Filozofia no prinsípiu sira ne'ebé koligasaun Governu ida ne'e hola kompromisu ho Povu.

...oooOooo...